

ርኢስ ኢሲያስ አፈወርቂ እት ወዕለ ሓለት ጀው አፍሪቀ ሸፊሕ ቀደመ

ዲብ ዮም 4 ሰብተምብር እብ እጅትመዕ ወዘረእ ለአንበተ ወዕለ ሓለት ጀው አፍሪቀ፡ ማሌ እብ እጅትመዕ ሚርሐት ድወል ወሕኩማት፡ ክምሰልሁመ መስኡሊን እድንያይ ወናይ መንጠቀት መነዘማት እት ለአተላሌ ወዕልቱ።

ርኢስ ኢሲያስ አፈወርቂ፡ አሰባብ ተቅዩር ሓለት ጀው አፍሪቀ ወእኩይ ተእሲሩ ዲብ ክልቀታይት መሕደር፡ ብዝሐ ሓያት፡ አብሐር ወሚሒጣት፡ ክምሰልሁመ ርዝቅ ዕጩይ ወሐዋናት ከደን፡ እብ መጅብለ ድወል ለልተብዑ ሲያሳት ወበራምጅ ለወዴሕ መብደእ ኤረትርየ ወጋብሆቱ ለከሰሰ ሸፊሕ አሰመዐ።

ሓለት ተቅዩር ጀው፡ እብ ክሉ እትጅሃት ምነ ሰኒ ለሻቅል ተሕድያት ዘበንን እት ትገብእ ትመጽእ ክምሰል ህሌት ለአከደ ርኢስ ኢሲያስ፡ እተ ብዕድ መሻክል እንዴ ትወሰከት ተእሲረ ዲብ አፍሪቀ ድቁብ ክምሰልቱ እት ለአፍህም፡ ሻፍገት ዐቦት እቅትሳድ እግል አከዶት ለህሌት መቅደረት፡ ቅድረት ወንዮት ናይለ ቃረት እንዴ ሆንኦ፡ እግል አብካት መናበረት ምስተቅብለ አጅያል ዲብ ብቅት ለካሬ ክምሰልቱ አብረህ።

“መቅድረት ወተእሲር ናይለ እንወድዩ ጸገም ሕበር፡ ምሰል መቅሬሕ ናይለ እብ ወጠንያይ፡ ናይ መንጠቀት ወእድንያይ ደረጃት ለህሌ እሉ ዱቅሪ መራሕል መትጸባዋ ወዕላቃት ቡ” ለቤለ ርኢስ ኢሲያስ፡ ዲብ ደረጃት ክል ደውለት፡ ለነአፈግሩ ዐገል ወለእንረስሙ ስታቲባት ፍዕል፡

እግል እሊ እድንያይ ተሐዲ ሰራይ እግል ልግበእ እሉ ሰበት ኢቀድራ፡ እብ ደረጃት ቃረት እት ፍዕል ለልውዕል በራምጅ ሴድያይ ዶር ክምሰል ለህሌ እሉ ወደሐ።

እሊ እድንያይ ተሐዲ ተቅዩር ሓለት ጀው እግል ጋብሆት፡ አፍሪቀ እግል ለአሸቄ ለቀድር እት ፍዕል ለልተርጀም ስታት-ወቅት፡ መትሰዳዳይ እግል ትጠውር ክምሰል ወጅብ ለሸርሐ ርኢስ ኢሲያስ፡ አፍሪቀ ምን ሕኔት እዲህ እግል ሓድረት ሓለት ለኬልም ጋራት ወእግል ጥረቂት ብዕዳም ትመድድ፡ አርዛቀ እንዴ አትሐሰሴት ሸንሀተ እግል ተአትምም ክምሰል ወጅብ ሐበረ።

ዲብ ደንገበ ህዩ፡ “ ሰብ ጥረቂት” ለልትበህሉ እበ በይአወ ገለድ ናይ ቢልዮናት ዶላራት ለልትፈገዕ እግል ኢለህሌ እት ለአተምብህ፡ “ ክም አፍሪቅዩን ምን እግል ክሉ እት ቤዕ ወሸረ ለለአቱ መተንካብ እት ብዕዳም እግል ንትባለሕ፡ አርዛቅን እብ ኖሰን እብ ዋጅብ እንዴ ሐንፈልኩ፡ በራምጅን እት ፍዕል እግል ነውዕል ወጅብ” ቤለ።

እሊ ክእነ ዲብ እንቱ፡ ርኢስ ኢሲያስ መዋመጦርለ ወዐሉ፡ ሚርሐት እብ ለትነዘመ መራሕል ህድግ ሕበር ክምሰል ሻረከ ወልቃአት ክምሰል ወደ ለአይክ ወዛረት እዕላም ሐበረው።

ርኢስ ኢሲያስ አፈወርቂ፡ ርኢስ ዊልያም ሩቶ እብ አሳሰለ ወደየ እግሉ ዐዘመት፡ ዲብ ዮም 4 ሰብተምብርቱ አሰክ ኬንዩ ለሳፈረ።



እት እስብዳልየት ብርሃን ዐይኒ ዐመልያት ዕንታት ገብእ

እት እስብዳልየት መርጀዕየት ብርሃን ዐይኒ፡ ምሰል ሐሽም ሐካይም ‘መሸርዕ ሂማላያ ካታራክት’ እብ መትዓዋን፡ ምን ዮም 3 ሰብተምብር እንዴ አንበተ ናይ ቅርሐት ዕንታት ዐመልያት ገብእ ህለ።

እብሊ እግል ሳምን ለለአተላሌ በርናምጅ፡ እግል ሐድ አልፍ መዋጥን ዐመልያት እግል ልግበእ ስታት ክምሰል ህለ ለሐበረ ሚዲካል ዳይሬክተር

እስብዳልየት ብርሃን ዐይኒ ዶ/ር ከሕሳይ ፍሰሓጽዮን፡ እብ ተውሳክ እት ኤረትርየ እግል ሰልፍ ኢነት ናይ ‘ኮርንያ’ ዐደዮት ዐመልያት ክም ገአ ሐበረ።

መዋ-መጦር እሊ፡ እት ፍንጌ አንፋር እስብዳልየት መርጀዕየት ብርሃን ዐይኒ ወለ ናይ ካርጅ መኤምረት ሕክምን ዕንታት ናይ ዕልም ወመትባዳል በራምጅ ክምሰል ህለ እብ ተውሳክ ሐበረ።



12 አንፋር ለብእቶም ሐሽም ሐካይም መሸርዕ ሂማላያ ካታራክት’ እንዴ መርሐ ለመጽእ ነፈር ቦርድ ዳይሬክተራት ዶ/ር መንግስ ባይሩ፡ ለሐሽም እት ሰነት 2019 እግል ሰልፍ መረት እት ኤረትርየ እግል ዝያድ 1.400 መዋጥን ዐመልያት ክምሰል ወደ እት ሸርሕ፡ እትሊ ናይ አዜ እብ ዓመት እግል ሐድ አልፍ ናይ ቅርሐት፡ ወእግል ዝያድ 20 ህዩ ናይ ‘ኮርንያ’ ዐደዮት ዐመልያት ክምሰል ወደው ወደሐ።

ዶ/ር መንግስ እንዴ አትሉ፡ ሰይይት አላት ለወደው እሉም ኤረትርየን ሰካን ቅብለት አምሪክ ሐመደ።

እተ ዐመልያት ምነ ሻርት ህለው አንፋር ሐሽም ሐካይም “መሸርዕ ሂማላያ ካታራክት” ዶ/ር ማት አሎሻ እብ ተረቱ፡ እት ኤረትርየ ዐመልያት ዐደዮት ‘ኮርንያ’ ምን አንበተ ለትሰመዐዩ ፈርሐት ሸርሐ።

ሸፊሕ ሰሕፊ

ፋእደት ለአለቡ ዋይዲብ ግምሽ!

እት ሐልፊዩ አምዒላት፡ ወጠንያይ ወናይ ዓዳት ተጀጥዕ ኤረትርየን እት ካርጅ እግል ሐምረጎት፡ እግል ዕላመት ኤረትርየን ላቱ፡ መትነዘም ውጁህ’ ናይ ወጠን ወሀውየት ሐበን ለታክያቱ ዓዳት ወቅዮም እግል አትነፋኡ፡ እብ ምስምሳሁ ህዩ ብዕድ አጃንዳት ሲያሰት እግል ከዲም፡ ዲብ ገሌ ድወል ነዐር እት ልዳረክ ትረኡ፡ እሊ እኩይ መዋዲት እሊ፡-

1) ለኢጀኒሕ ስሙድ ሸዑብ ኤረትርየ ለአበህረረየን ዐባዩ መአሰሳት ሰለለ (አሰክመ ሞሳድ) ሰባተት ሸዑብ ኤረትርየ እግል ለሐማርጎ ሐዳም አዝናብ ሰቱቱ ለህለው፡ ፋእደት ለአለቡ ዋይዲብ ግምሽ ቱ። ተፋሲሉ ዲብ ተሌ አውቃት።

2) እብ ሰበት፡ “ ኤረትርየን ላጅኢን” ልትነሸር ለህለ ሕሰይመ ክሉ ጀላብ እግል ለአምሩ፡ ሐቃይቅ ለልአርኤ ተፋሲል ተወዴሕ እግል ልተላሌ ቱ።

ውዛረት እዕላም
አሰመረ
05 ሰብተምብር 2023

ርኢሰ ኢሰያስ ምስል ርኢሰ ባንክት ዐማር አፍሪቀ ለህድግ



ርኢሰ ባንክት ዐማር አፍሪቀ ዶክተር ኣኪንዉሚ ኣደሲና፡ ዲብ ሄለል ሰብተምበር ምስል ርኢሰ ኢሳይያስ አፈወርቂ እንዴ ትራክብ ሀድገ። ለህድግም ዲብ ሐርሱ፡ ጣቀት፡ ጠወርት ግንራራብ በሐር ወብዕድ መጃላት እቅትሳድ እተ ትገብእ መዓወነት ለአተንከበት ዐለት።

ለዲብ ኤሪትርየ ዝያረት ክልኡ-ምዕል ለወደ ርኢሰ ባንክት ዐማር አፍሪቀ ዶክተር ኣኪንዉሚ ኣደሲና፡ የም ሐቐ አድህር ርኢሰ ኢሳይያሳ አፈወርቂ እንዴ ተለዩ፡ እት አቅሊም ግብላት -ምዴርየት ድባርወ ልትሰርገል ለህለ በራምጅ ዐማር ረአ።

ዝያረት ዶክተር ኣኪንዉሚ፡ ከዛናት ምስላም ወሎ፡ ወምስሉ እንዴ ትጻባጠ ገብእ ለህለ ወራታት ሕፍዘት ማይ፡ ብንዩት-ተሕትየት ሐርሱ፡ ሰናዐት ሐርሱ፡ ጣቀት ጸሓይ፡ ክምስልሁ-መ ተዋብ ንዋይ ወዕማር ሐሊብ ለከምከማቱ።

ዲብለ ዝያረት፡ ኤሪትርየ እብ መቅደረት ኖሳ ለበኔቱ ባሕነት ማይ፡ ጸብጡ ለህለ ቅያሱ፡ ሐርሱ-መስየ እግል አርሐቦት ልትሰርገል ለህለ መሻፊዕ ዲብ መትቀዳም እቅትሳድ ኤሪትርየ ለልሀሌ እግሉ ዶር እባ

ክሰሱ፡ እብ ሰብ መቅደረት ወውቁላም ሰብ-ሰልጠት ተውዴሕ ተህዩበዩ።

ርኢሰ ባንክት ዐማር አፍሪቀ ዶክተር ኣኪንዉሚ ኣደሲና እግል ኤሪትርየ እተ ሀቦዩ ሐብሬ፡ ኤሪትርየ እብ መቅደረት-ኖስ ባንዩቱ ለህሌት ባሕነት ማይ ወምስሉ ለትገይስ ብንዩት ተሕትየት ወመአሰሳት እብ ዕንቱ እንዴ ገንሐ እግል ልሽሀድ እቡ ምን ቀድረ ፋሬሕ ክምቱ ወክም ወድ አፍሪቀ ህዩ ክም ሐበዩዩ እት ለሐብር፡ ‘ብጽሕት ለህሌት መቅደረት ወበቃዐት፡ ሩእየት ሽዑብ ወሕኩ-መት ኤሪትርየ ዲብ አሰበቆት ሐዞት-ውቅል ክም ተህሌ እግል ዳምን አነ’ እት ልብል፡ ባንክት ዐማር አፍሪቀ እግል ትሰደዩ ለበ መዳሊት አክደ።

ዲብለ ዝያረት፡ ወዘር ማልየት ወዐማር ወጠን ዶክተር ገርጊስ ተኽሌሚካኤል፡ መስኡል ሽኡን እቅትሳድ ጀብህት ሽዑብየት እግል ዲሞቅራሚየት ወዐዳለት አሰይድ ሐገስ ገብረህይወት፡ መስኡል መርከዝ ከራይዋ ወሐብሬ ጆሚትረ ጌታቸው መርሃጽዮን፡ ክምስልሁ-መ መመቅርሓይ ሽቅል መአሰሰት ተዋብ ንዋይ ወአዝርአት አሰይድ ክብረኡብ አብርሃም ሓድራም ዐለው።

ሽፊሕ ጀብህት ሽዑብየት እብ መናሰበት ሐቱ ሰብተምበር 2023

ዝክረት 62 ሰነት መትአምባት ግድለ እብ ሰላሕ ጀላብ ሕርየት፡ እተ ንትዘክር ወእንፈቅድ ዲቡ ለህሌነ ናይ የም ዓመት ዝክረት ሐቱ ሰብተምበር፡ ክምሰለ ናይ ዲመ እብ ክሰሰለ ለኢትብሌ ወለኢተህሰስ አሀምየት ተእሪክ ወተርጀመተ እግል ነኡተላሌ ወንጌምም ዋጅብቱ። ሐቱ ሰብተምበር ዲብ ናይ ኤሪትርየ ታእሪክ ክምሰል አምዕል ገለድ ሕጡዋ ወዝክረት ሐበንተ። ሰበት እሊ ክም ሐቱ ምን ለቀለየ አምዴላት ዓያድ ወጠነ ለቀሌት ኣካን ሰበት ቡ እብ ኩሉ ሽዑብ ኤሪትርየ ዲብ ዐድ ወካርጅ እብ ለተአሰትህለ ሕሽመት ዐዩዶተ ነባሪ ወጠነ ጋብእ ሀለ።

ኤሪትርየ እበ ረዩም፡ መሪር ወኢልትቀደር ልትብህል ለዐለ ግድሉ፡ ምን ነክከክ መስታዕምረት እብ ሐለተ፡ እብ ኤማን ወሰባተተ እንዴ ትፈርቀቀት ሀለዮተ አክደት። እብ ግድለ መሪር ምን ረመጭ እሳት ለትወለደት፡ ሐቐ ሕርየተ ህዩ፡ ወራራት ብዞሕ እንዴ አፍሽለት፡ ጸብኢት ድቁባም ዐለም እንዴ ዳፍዐት ቱ ሐር ሀለዮተ ለአሰበተት። እትሊ ወቅት እሊመ፡ ናይ መስተቅበል ረሀየተ ወዐማረ እግል ተአክድ፡ ዲብ አርወሐተ እንዴ አምነት ትትጋደል ለህሌት፡ እብ ዐላይም ኤማን ወሰባተት ለትትአመር ወትትሌሌ ዐድ መሐርበይት ቱ። ዲብ ኤሪትርየ ምለዐል ኩሉ ብዕድ አርዛቅ ለልትረተብ ለቀለ ክብት፡ ሩእየት ዋድሐት፡ ፈሀም ዛይድ፡ ሐጠጦት ዲብ መብዳእ ዓድል ወሳብት፡ ለኢትትፈንጠር ውሕደት፡ ሐለት ኤማን፡ ካህላት ወበታክት ቱ። እለ ቅወት እለ ህዩ፡ ታክያት ወጠን ወፍጥር ሽቅል ዐማር ወረሀየት ቱ።

አባያምነ ህዩ እለ አማን እለ ሰበት ለአምሮቱለ እለ ሐለት እለ እግል አትሐወኖት ወፈንጠሮት፡ እብ ከይናት ጨቅዋ፡ ዝልም፡ ሐርብ ደሚር፡ አትካፍአት፡ አትካሰሐት ወመረር እምበል ዕርፍ ላሊ ወአምዕል ልትጋደሎ ለህለው። ግድለ ላኪን መርበይ ራቴዕ ወዓድል ኢጸብጠ ምን ገብእ፡ ፍሬ እግል ልትረከብ ምኑ ወእግል ልትዐወት ክም ኢቀድር እመርቱ። እሊ ህዩ ዲብ ድግለ ሽዑብ ኤሪትርየ እብ ተጃርብ ዐውል ቃሊ ለተአክደ እሰባት። እተ መብዳእ ሳብት፡ ሩእየት ዋድሐት፡ መትካም ወእዳረት ለኢትጠወረ ዲበን ሰነዋትለ ሰልፍ ግድለ ታሕሪር ለተሐለፈ መሐባልክ ወሐርብ ሕድ ህዩ ተአምርታሁቱ። ዲብ ሄረር ግድለ ላኪን፡ ለእግል ጀብህት ሽዑብየት ክም ተንዚም ሚርሓይ ለነድቀ ወለአሰበተ፡ ሩእየት ሰውርየት፡ ናይ መስተቅበል

ሀደፍ ዋዴሕ፡ መትካም ድቁብ ወሚርሐት ሰበት ጠወረት፡ ለግድለ ሕርየት እብ ዐውቱ ተ’መ። የምመ ምን ገብእ ምስል ትምኔት፡ ሽንህትነ ወቃሊ ዐውል እሰትሽሃድነ ለትትመጣወር ወጠን እግል ንብኔ ወነዐምር፡ ለግድላነ እግል ለአተላሌ ላዝም ቱ። እበ ዲብ ሚሳቅነ ወጠኒ ሽርሕት ለህሌት ሩእየት ወእሰትራተጅየት እንዴ ንትመረሕ፡ እምበል ሕላሌ እብ ኤማን ግድላነ ወዐዳለት ሀደፍነ እግል ንትዐወት ብኔ። እትሊ ግድለ እሊ ህዩ፡ ጀብህት ሽዑብየት፡ ክም ሬፍዐያት ገለድ አማነት፡ ሙአሰሰት ደማነት፡ ውሕደት ወሐቅ ሽዑብ ኤሪትርየ፡ ድድ ኩሉ አባይ ወጠን፡ በዐል አፍካር ጨቢብ ወመካፍለይት ሽንህት ለዐም ጀሃት ወጠባዬዕ እንዴ ትጋደለት ወአትጋደለት ውሕደተ ለከምከመት ወዕምርት ኤሪትርየ እግል ትብኔ፡ ናይ ሚርሐት ተረተ እግል ተአትምም ናይ እለ ለህሌነ ዲበ መርሐለት ታሪካይት መስኡልየታቱ።

ዲብ ብናእ ወዐማር ወጠን፡ ጀብህት ሽዑብየት ለህሌት እግል መስኡልየት ወሀደፍ፡ እብ ፍዕል እት ትእሪክ ለተአክደ እንዴኢትን እብ ሽንህት ኢመጽአት። እብ መቅደረት፡ ጀብህት ሽዑብየት እብ ተፍኪረ ክም ታክያት አሳስ ሲያሰት ወጠን እንዴ ገብአት አተላለየ ወመትደቃብ፡ እግል መሳሌሕ አሳሲ ናይ ሽዑብ ኤሪትርየ ወዐቦት ወተጠውር መስተቅበሉ ለትክድም አሀመየት ወአትሐዘዮት ተእሪክብ። ጀብህት ሽዑብየት ህዩ፡ ምን ሽዑብ እንዴ ኢትትፈንጠር ወኢትትክረም፡ እግል መሳሊሐ እምንት ሰበትተ፡ ዲብ መሻረክት መጅተማዕ ዛይደት ለተአሰሰት ዐዳለት እጅትማዕየት ለትመደደት ዲቡ ድቅብት ወዋውርት ኤሪትርየ ናይ ብንዩት ሀደፈ እግል ተአተላሌ ላዝምቱ።

ዝክረት 62 ሰነት ግድለ ታሕሪር እተ ነዐይድ ዲቡ ለህሌነ ወቅት፡ ለጊሰናሁ ሄራር ረዩም ወዕውት እግል ንትዘክር ወንትሐበን እቡ፡ ዋጅብ ወሐቅቱ። ቀደም እንዴ አንጸርነ ዲብ ነሳድር ህዩ፡ እብ ፋይሐት፡ ንዝምት ወሳብተት መሻረክት ሽዑብከ፡ እግል ሕርየትነ ወሲያደት ወጠነ እንዴ አደቀብነ ወአድመክ፡ ዐዳለት እጅትማዕየት ለሳሱ ወመጅተማዕ ለታክያቱ እቅትሳድ ወጠን ድቁብ እግል ንብኔ እምበል ሕላሌ እንከድም ህሌኔ።

ኤሪትርየ እብ ተእሪክ እግል ሰነበት፡ ሰላም ወመዓወነት መንጠቀት፡ ክምሰሌሁ-መ እብ መሳዋት ወመትሰዳዳይ ለሀደፈ ዐዳለት ሐዳሱ፡ ንዝም ወበሰር ሚርሐት ዐለም ዲብ ዐውቶት ምነ

ለልትጠለብ ዋጅብ ለተአተምም፡ እት ሰላም ወመዓወነት ገባይል ክም መሰል ሰኔት ለትትሸረሕ ወለትትሰበል ዱለትተ። መንጠቀትነ የመ ምን ገብእ፡ እብ ክላፋት ወነዐር ኢመስኩብት ወመትብጭባጭ ትትሀምበክ ሰበት ህሌት፡ ኤሪትርየ እበ ለኢልትበደል መብዳእ እግል ሰላም ወሰነበት መንጠቀት፡ ወምኑ ወኪንመ መዓወነት ወመቅሬሕ መንጠቀት ጀዳድ ለለዐውት ንዝም እግል ትብኔ፡ እንዴ ኢትትሐለል እግል ትክደም ዋጅብቱ። ዲብ ቀድያት ዐለምመ እብ መብዳእ ሳብት፡ ሲያሰት አሮት ንዝም እቅትሳድ ወዐሚም እግል ዐለም እብ ተማመ ዲብ ተማሰ ብቅት ወመትብጭባጭ ሀገጋይ ዲበ ኡቱይ ዲቡ ለህለ ወቅት መትዐደዩ፡ ኤሪትርየ ምስል ክሎም ሐዝዩት ሰላም ወዐዳለት ላቶም ገባይል እድንዩ ወቅዋት እንዴ ገብአት፡ ድድለ እብ አንፋር ሐዳም ወሰብ መሳሌሕ ብሕተ ለልትዋሌ ወለልትመረሕ ዐሚም፡ ጨቅዋ ወዘማቱ ለሰብብ ንዝም እንዴ ትትጋደል፡ ሕርየት ወመሳዋት ለለሀደፋ ንዝም ዐለም እግል ለህሌ ወልትብኔ፡ ዋከተ እግል ተአትምም ላዝምቱ።

እትሊ ዝክረት 62 ሰነት አምቡተት ግድላነ ጀላብ ሕርየት፡ ሰላም፡ ዐማር ወዐዳለት ንትዘክር ዲቡ ለህሌነ ወቅት፡ እግል አሳሲ ወዴማት ወጠኒ ሐር ላቱ፡ ምን አጅል መሳሌሕ፡ ሐቐ ሽዑብ፡ ዐዳለት ወሕሽመት አዳም ለገብእ ግድለ ለትደፈዐ ዐውል እሰትሽሃድ ቃሊ እንዴ ንትዘክር፡ እብ ብነ ዋውርት ወሰርጊት ኤሪትርየ ፈትም እግል ንፍደዮም ገለድ አትያም ሕኔ። ጀብህት ሽዑብየት ህዩ፡ አዜመ ክምሰል በዲረ ዲብ መሻረክት ወንዩት ሽዑብ ኤሪትርየ እንዴ ረከዘት፡ እብ ኩሉ መቅደረተ ወሐለተ እግል ብናእ ወዐማር ኤሪትርየ እብ መትሰባል እት ከድም፡ አማነት ለልትከበት ወተእሪክ ሓር ለሸቂ ጂል ወሙአሰሳት ወጠን ድቁብ እንዴ ከልቀት፡ ናይ ተእሪክ መስኡልየተ እግል ተአትምም፡ አዜመ ግድላህ እግል ተአተላሌቱ።

አማነት ሐቱ ሰብተምበር እብ ብናእ ወዐማር ኤሪትርየ ዋውርት ወዕምርት እግል ነኡትምምቱ።

ሹውሀዳነ እግል ዲመ ልትዘከር!

ጀብህት ሽዑብየት እግል ዲመ-ቅራሞየት ወዐዳለት

ሐቱ ሰብተምበር 2023 አሰመረ

ዐውቱ እግል ገቢል!

ክል አርቡዕ ለትጠ'በዕ ጀሪደት

መዳልያይ፡
መሐመድ እድሪስ

ለደአውት ወአርተዖት
* ዘሀረ ዐሊ
* ፋዋነ አድም

ተለፎን፡ 121797/07121322
ፋክስ፡127749፡ ዕ.ሰ.ቡ፡ 247

ተውዝዕ ጀሪደት፡
ተለፎን፡ 200454

አትአመሮት፡
ተለፎን፡ 125013፡ ዕ.ሰ.ቡ፡ 1284

3^e 746

ምርት ምን ዐድ ወለት አክለ ለገብኦ እግል ናይ ሸክር ወፈድል ለእግለ ዐድ ወለት ለሀይቡ ለአሰቢሐ ሰኒ ሰምዑ ሐቆለ ጸንሐ። “አብ ፋጥነ ዑመር እት አነቢ ሰሌ! (“ሽፋዑቱ ለሓድረነ ወምን ሽመዩ ለአሱቴን”) እሊ ለልትሻበበኒ ህለ ቴልካሁ እሱወ ቱ?” ተሰአለዩ። “እሊ አትካፋኦ ልትበህል እግል ሐኩ አብፋጥነ ዕመር ከራክቡ ወልሓልዑ ትርእዩ ይህሌከ!? ላመ ትደገመት እግልነ በህለት ብዞሕ ነአወይን ምነ ይህሌነ እንቤለ። ከአዜመ ለአተንበሊተ በልዑ ሰያመ እት ወቅት ሶም ሰበት ትወለደት ተ ገብኦ ለእባ ትሰማት ለሰያመ እብል ህሌኮ” ቤለ። ከእግል ሀርጅ ወደአል አሰክለ ዕጉል ለዐለ መሐበር ትወለበ እት ለአትባርህ።

“ውሽ ውሽ እንተ አዘካሂ
እሊ አዳም ትብዴ እቡ አብፋጥነ
ዕመር። አብሐርከ ብዙሕ ቱ
ወልባብከ ዐጂብ ወምስትንክር፡
ረቢ ካርዕከ ልግበእ። አዜመ ለእት
ሸፍርነ ጣርቃም እግለ ለህሌክም
መርዓት እበ ትፈረጀት። አክለ
አትካፍአ ትቤተ ሐኩ ህዬ የሀው
ሚ ልብል ህለ? እቤ ከእት ሸቀላት
ጋብእ ዐልኮ በሪ ወዳኩ። እሉም
ሰሪያም ምን ገብእ ለለአትካፍአም
ረክበው እቤ። እግል እብር ተ
ምንዲ እብል ላቱ አነ ኖሾ ቀደሚከ
ሞራዬ ወሰደፍዬ ወነሰእኮ እግሉ።
አትካፍአ ወአትካፍአ ወከማጀነ
ውሰክ እግሉ ህሌኩ። እትከ እግል
ልምጸእ እንዴ ትቤ፡ አሰክዬ እት
ዋልዩ ወእት ትጌልሉ ሸፍርዬ
ዑዩሩ ኢተህሌ!፤ እግልከ ላቱ እብ
ልባብ ለሐልፈከ ወእብ መትረድ፡
እቼ ፍረህ ሓይሰ ሰብኡ። “እዬ
በሎ” ትቤ ልቡለ እሲተ ላቅሰ።
አዜመ እቼ ፍርሆ እሊ አትካፍአ
ትብሉ ለህሌከ” ቤለ ከህቱመ ሰሩ
እት ልትደኣል ወሰሩ እት ለሀርጅ
ግልት ልቡ በልሰ ቅብላት ዐድ
ሕጻን ወእብ ፍንቱይ ህዬ ቅብላት
አብፋጥነ ዕመር።

ዐድ ወለት ግድም እብ ምን ዐድ ሕጻን ሙጽኡም ለዐለ ሐምዴ ክሉም ኣበው ወኣብዕቦታት ውሓሎታት እግል ልድሐር እግሉም ወየኣበው። ላኪን ወለት ክሉ ኣሰር ኣብህ ወእመ ሰባት ለህዩቤ፡ ጎማቶም እግል ልጭመሞ ምነ ክሉላም እቲ ለዐለው መሕበር፡ እግል ኣብ ዐሊ ኖራይ እንዴ ነቅመው፡ ቀንጸው ምኖም። እተ እግል ወደው ጥውየ እግል ኖራይ ስያመ እግል ሰልፍ ዶል ኣፉህ ለፈትሐ እተ እግል ልድሐር ጭመት ጎማቶም ኣሰኣለዎ። ህቲ ላኪን ለትሰምዕ እዘን ወለ ልትክበት ደሚር ኢረክበው እቲ። እግል መሐበር ክቡት ለዐለ ኣብዕብ ስያመ ዝያድ ክሉም እግል ልስመያም እብ ሐሰብ ወክትል እግል ወልዱ ረምቀ ውኣትሓለ። እት ደንጎበ ህዩ እብ ክእኒ ትራደደ ምሰሉ።

“ትሰምዕ ህሌክ ኖራይ!?
እንታመ አነ ምንዲ ትገሰኮ እክ

ኢህ ይበ !!!

እበ ትነደቅከ ወጰሲት ተሀየብኩ። አዜ የም ወለቼ ንኢሸ ሀሌት እንዴት ትቤ ትከለክ ሀሌኩ። ፈጅር ሀዩ ወለትክ ለገንግርመ ኢልትሐገል ቀብር ግበኢ። ረቢ እንዴ ፈርህከ ወነቢ እንዴ ትከለብከ ወረዳነ እግል ትንሰኢ ወመድሐር ዋልዴን ምነ እግል ኢትሐገል ጎማትነ ሰመዕ። ኢቀባዬ ትቤ ምን ገብኢ ግድም ሕነ ሸባብ እግል ንግበኢ እግልካ ቱ።



እለ ወለት ደሐረ እግሎም። ፈጅር ካልእ አምዕል ሰበት ገብአት ሕክመ ወፍርደ ምስለ እግል ልምጸእ ተ። ወለቼ ሲያመ እግል ትትገንገር ላቲ። ኣነ ደሚርዬ ኢወድየ እግልዬ። ሐሬ ኣነ ትዕስ ይእፈቲ። ሰበቡ እብ ትዕስ ለተአቀብል ሰበት ይህሌት። ኣነ ሐብ ሰኒዖት ኣናቲ!!! በዲር ላቲ ናይ ኣቡከ ሕርድት ወሪደ ተ ለዐለት። ወሃም ህዩ ላመ ገንደለ ወበዐል ሰይፍ ገብእ ተ ወውላዱ ሰምዑ። ዮሙቲ ክምሰለ ኣቡከ ዕመር ልብለ ለጸንጉተ። ኣትካፍኣመ ልብሉ ለዐለ እምበል እለ ኣዜ እቺ ማጽኣት ለህሌት ተ። ምሮት በዐል ዐድ እት ሰሙዉ እንዴ መጽኣው። ከሐቐ እት ሸፍኑ ወውላዱ ይሐክመ ሚ ህሌት መሰለከ! ቤዛከ ትግበእ። እሊ ለእግሉ ራዶሱኣ ለዐለው ኣዜ በሊሱ እሊ ናደክ እግል ልግበእ ርሕዬ ኢትወድየ እግልዬ ወደሚርዬ ኢልትከቡተ። እግል እለ ሲያመ ለትሳድፍ ህዩ ሐሬ ኣቡከ ሕሚ እተ ወሐምድ” ቤለየ እብ ሸዑር ቀጽብ ወበኣሰ። ክምሰል ንፋዝ ህዩ ቅንጸት ሻፍገት ቀንጸ ምነ መሐበረ ጡውየ ወልዱ ኖራይ።

ምን እለ ዋውየ እለ ኖራይ
ወአብሁ ንየዮም ሰኒ እት አድሕድ
ኡኩይ እት እንቱ ሸንከትለ
መሐበር ክሉል እተ ለፀለ አካን፡

ክል ምኖም ከእገሩ እት ልስሱከ
አቅብለዎም። ላመ እግል ጎማቶም
ልትጸባሮም ለዐለው ሐዘቦት እሴት
ምን መጋደስ እገሮም ፍሬ ፍገራት
ጎማቶም ወጥውያሆም አምራም
እት እንቶም ጸንሐዎም።

እሊ ዎሮት ሕጼ ምን ሔጽየት ሲያማ ቱ ለዐለ። ብዝሓም እሎም እብ ልቦም ልተምነወ ወእብ ዋልዴኛም ለሐዘወ ዐለው። ሳኪን

አምሳል ትብእሐክም ለትትበህል እተ
ኢትሰምዐት ወኢትርኤት። ትምኔት
ወሸንሂት ላኪን ጽምእ ጽሙእ
ኢተአረዌ። ንዩት ወሸንሂት ሲያመ፡
ወወቀይ ወምራድ አቡህ ኖራይ
መትሳናይ አበወ። መትሳናይ ህዩ፡
አብ ንዩት ሌብ ኢኮን ለተምም።
ንዩት ዐደድ ሐጻተ ክምሰለ
ልትበህለ፡ ምሰል ወቀይ እግል
ትትሳኔ ዐለት እግለ። ላኪን ትምኔተ
ጀህረት ጽብሕ ምድር ለትመሰል
ሲያመ ማይ ሸራባት ጉብኣት።

አይወ! ማይሸራባት ለትርእዩ ወለ ኢትብጽሐ፡ ምስል የውየዌት ለጸሓይ ዕንታትከ እት ጠይፍ ጽምእከ ለኢትረዌ ምኑ። ሲያመኝየተ ወትምኔተ ሸርከት ሐያት እንዴ አሰሰት፡ እት ሕቅፍ በበል ቤተ ለዘት ሐያት እግል ተአትዳውር ቱ ለበለት። እግል ተአንሰ ወተአትብዕ ብከር ወዳግም እግል ቲበል ተሐዘ በለት። እት ክል ቅንጸተ ወግሳየተ ህዩ አቡህ “ሙብሩክ ቤት ማል ወዕያል” እንዴ ቤለ እግል ልሳርሐ ተምኔት። እለ ዘበት እለ ወአቡህ ላኪን መትራካብ አበወ። ሀለዮትከ እት ሐያት ህዩ እብ ሐያት ሸርከት ትትአከድ፡ ጠምጠም ወለዘት ሐያትመ ምስል ቀሪምከ ተአትዳውሩ ወልዋዕም እግልከ።

ልተገሌ...

**ናደረት ዝኸረት 62^{ይት} - ሰነት
ሄለል ሰብተምበር**



ሄለል ሰብተምበር - ዝክረት 62ይት-ኢነት መታኣምባት ንዓል ሸዓብ ኤርትራዊ፡ እት 31 ኦገስት ዲብ ኣስመራ - ቃዕት ሲነማ ሮመ እብል ቀርቦ ዕዕ. ዐዳት እብ ነያረት ትዘክረት።

ለእብል ልጅነት ዐያድ ወጠን ለትዳለ እብ ተለፍዝዮን ኤረትሮየ ወክርን ገቢል ምባሸር ለትጠለቀ በርናምጅ፡ ምራድ ሸዑብ ኤረትሮየ እግል ሕርየት ወእት ጀላህ ለትደፍዐ ዐውል ቃሊ እብ ኩሉ ጀዋንብ፡ ልእኩት ሄለል ሰብተምበር እግል ኦጅዶል ለለኦረፍዐ መስኡልየት፡ ክምሰልሁመ መጋብህት ትርድት ናይ ሸዑብ ኤረትሮየ ለለኦርኤ ዐላ።

ለእብ ገዳም ወሽባብ ላቶም ፈናኔን ለቀርቡ፤ እብ ትልህያታት ለትነደረ
ሐልዩት፤ አናሺድ ወድራመ፤ ለትፈናተ መራሐል ንዓል ለወክል ሐዲስ
ወለልትደገምቱ ለዐሉ።

እሊ ክእን ዲብ እንቲ፡ እበ መናሰበት ዲብ አስመረ - መጦር መክተብ እዳረት አቅሊም ምግብ እተ ምዕላ- ሄለል ሰበተምበር እንዴ አንበተ አስክ ሰበተምበር 5 እግል ሸዑብ ፍቶሕ ለእንሐ ዕፌ ሰወር ትፈትሐ፡ ለዕፌ፡ ልጅነት መሓብር ምናድሊን አትዳሉቱ።

ለእግል ዐመልየት ባረንቶ ናይ ሰነት 1985 ለሸፊሕ፡ ሐድ 1,300 ሱረት ለከምከመ ዕፌ፡ ሴድያይ መስኩል ኦርካን ሎጅስቲክስ ውዛረት ድፋዕ - ሜጀር ጀነራል አስመርም ገረዝጊሄር እንዴ ደሕረ ፈትሐዩ።

ዲብሊ ውዘራ እ ለልትረከቦ ዲቦም ውቁላም ሰብ-ሰልጠት ሕክ-መት ወጀብህት ለሐድረው ዲብ ዓደት፡ መሰሉል ለጅነት መሐብር ምናድሊን አሰይድ ሰለሞን ተወልዴ፡ ዐመልየት ባረንቶ 1985 ምስትንክር ላቱ ዐመልያት ምነ ጀረ ዲቡ ተእረካይ ህጁማት ምሮት ክምሰልቱ ሐቆለ ሸርሐ፡ ለተእሪክ ዲብሊ መጽእ እጅያል እብ ዋጀብ እግል ዐደዮቱ ለአመመ ክምቱ ሐበረ።

መመቅርሐትለ ዕፌ እብ ጀሁቶም፤ ለአባቱ - መዲነት ባረንቶ እግል ሐረርት ለገብአ ህጁም ወለተለ ሕሩባት ወእንሰሐብ ለሸፊሕ ሰወር ወከራይቱ-ሐብፌ፤ ክምሰላሁመ ዲብ ተሕረር ባረንቶ ለእስተሸህደው ምናድሊን ሰወርም ወእስማየም - ምስል ተእሪክ ናይ መትነዛሞም ወእስትሸሃደም ለክምከም ክምቱ ሐበረው።

ህቶም እንዴ አትለው፡ ዲብለ ተ'ሌ አውካድ ምስትንክር ላቱ ናይ
0መልዶቶ ብዕድ እግል ዕዕ. እግል ልቅረብ ስታት ክም ህለ አፍህመው።

እሊ ቃርብ ለሀላ ሰወር፡ 38 ሰነት ግረ እንዴ በልሱ፡ ለሐልፈው ሐላት ክም አትፋቀደዎም ለሐበረው ዌፍየት፡ ለጽብዋ፡ ደቅብ ጀብህት ሽዑብየት ዲብ ወሰቀት ለለአርኤ እንዴ ገብኦ ክም ጸንሐዮም ሐቀለ ሐበረው፡ እሊ ለመስል ዕፌ እብ ትሉሉይ እግል ልቅረብ ትፋነው።



4^ይ ክፋል

መቃብለት ምስል ወዚር ሐርስ አሰይድ አረፋይኔ በርሄ

** “ወጀዶት ቅዝእ ለበ ነብረ፡ ለበበ ሀደፍናቱ ”**

• እት ዳፍየት ባልዲን ወሕማማት ብቅል፡ ለሀሌት እግልነ ስትራተጅየት ሚ ትመስል?

- እብ ዓመት፡ እግል ባልዲን ሐርስ እት ክልኤ እንዴ ካፈልነ እንርእዩ። ለዎሮት ክፋሎም ምን ጠቢቦቶም ሕድድት ሐረከት ለሶም እት ገብኤ፡ ለብዕዳም ህዩ፡ ‘ዐለዶቶት’ ቱ ለእንብሎም፡ ምን ኣካን እት ኣካን፡ ምን ደውለት እት ብዕደት፡ ወምን መንጠቀት እት መንጠቀት፡ ሰኒ ሻፍግ ወኤዝያይ መግዕዝ እት ወዱ፡ እት መደት ሐጫር እተይ ሐርስ ብዘሕ ለበልዎ ቶም። እበ ሰልፋይ ክፋል ምን ነኣነብት፡ ሕኩመት ኤረትርየ ምን ሕርየተ ትነሰእ እንዴ አንበተት፡ እት ንዘም ወራታት ጋብሆት ባልዲን (Integrated Pest Management - IPM) ተአምን። እሊ ህዩ ምን ዓፍየት ወአፍረየት ትርበት እንዴ አንበትኩ፡ ባደሎት አዝረኣት፡ ራቀቦት ዘርእ፡ ሀረግ ንዘም፡ መትነፊዕ ሕማማት ወባልዲን ለልክህል አዝረኣት ወብዕድ አብሳር ለከምክም እት ገብኤ፡ ናይ ቀመማት ድድ ባልዲን ላዝም አትሐዘ ምን ገብእ ንትነፊዕ እቡ። ምን ክልኤ ሰነት እንወዴ ህዩ፡ ሐቱ ዲብ አፍረየት ሸፍር ጠቢቦት ወድድ ባልዲን ለትሸቄ ልጅነት እንዴ አቂምነ፡ ሄራርነ አሰክ ታምም ናይ ጠቢቦት ሐርስ (organic farming) ውጅሃሙ ህሌ። ሰኒ ሰእየት ለትሀይብ በዳሪት ክም ተ ህዩ እብ ፍዕል ርእያመ ህሌ። ለካልኣይ ክፋል፡ ለዐለይታይ እንብሉ ባልዲን ቱ። እሊ ባሌዕ እሊ፡ አንበጠ ሰቦት፡ ባርኖስ-አፍሪቀ፡ ሰራይር ሺቃ ወዐለይታይ ባርኖስ ቀይም ከምክም። እብ ፍንቱይ ለሰለሰ ቀዳምያም፡ ምን መደት ቅድምት እንዴ አስተብደው፡ ዲብ ሐርስ ዐድነ ደማር ክብድት ለአጃሩ ለዐለው ቶም። ሐቆ ሕርየት ላኪን ሕኩመት ምን ሰልፈ እግል ትጋብሆም፡ ምን ከደን እንዴ ነፍረው ሐቆ መጽአው ህዩ፡ እት ዐድነ ክም ትከረው እብ ሐዲስ እግል ኢልንፈር፡ ሐን መራቀብት ለትኣትዮም እቡ በሰር ኤተነት። እሊ ቱ ህዩ ምን ቀደም ሰኒን ብዘሕ እንዴ አንበተ፡ እሊ ባልዲን፡ ዲብ ኤረትርየ መደረት ለልኣጃሩቡ አብካት ቅሩብ በሕ እቱ ክሩይ ህሌ።

• ዳላትነ ዲብ ጋብሆት አንበጠ ክም መስል ለትታዕለብ ዐድ ተ። እሊ ዐውቱ ምን ሚ ትረከብ ትብል?

- ዐድነ እት ረኣሰለ ምን ድወል ግዋሬ እብ ምድር ልግበእ ወመዐደይ በሐር ለመጽኣ ወራራት አንበጠ ባዶብ፡ ርሐብ ክፋል ግንራራብ በሐረ ወብዕድ ምድረ፡ ዴማት መትፋራይ አንበጠ ሰበት ቱ። እግል እሊ ዴራይ ባልዲን እት ራቀቦት ክል-ዶል እት መዳላይ ተ ለትነብር።

እብ ፍንቱይ፡ እግል ዲብ ቀበት ዐድነ ለልትፋሬ አንበጠ ሰቦት፡ ሐኪ እት ተዐቅብ እብ ዋጅብ ቱ ለታብዐ። ስትራተጅየትን እት መራቀብት አንበጠ፡ ዲብ ጋብሆቱ ለኣተንክበት ተ። እብ ዓመት ህዩ፡ እት ረኣሰለ እት ርሐብ ምድር ወሻፍገት መራቀብት አንበጠ ለንትነፊዕ እቡ ኪማእያት ድድ-ባልዲን፡ እት ውዛረትን እበ ህለው ሰብ መቅደረት ለሰነዐወ ሚጻይት ኣለት፡ ዕሽል አንበጠ እንዴ ጀምዐክ እቡ እት ሙነት ደወርህ እግል ተአውዕሉ ልትሸቄ ህሌ። ምን 1996 እት ላቦራቶሪ ክሩይ እበ ጸንሐ ሚታራዝዩም ለልትበህል ጅንሰ መቀየሰመ ባይሎጅያይት መታብዐት እንዴ ትጀረበት፡ ሰእየት ለትሀይብ ፍገሪት ሃይበት ህሌት። እብ ሐጪሩ ሕኩመት ኤረትርየ፡ አንበጠ እግል ጋብሆት ኩለ መቅደረት አዳመ ወአርዛቀ እንዴ አዳሌት ክል-ዶል ዱሊት ሰበት ተ፡ እትለ ለህሌን ዲብ መንጠቀት ልግበእ ወዲብ ዓለም እብ ግዲይ፡ ኤረትርየ ክል-ዶል ክም መስል ሰኔት ተ ለትነሰእ። ሐን ውዛረት ሐርሰ፡ እብ መክተብ ወዚር ሐርስ ለትትመረሕ፡ እብ ቅሰም መታብዐት ወአድረሶት



ሐርሰ፡ ቅሰም ክዳማት ቀዋኒን ወመራቀብት፡ እዳረት ወማልየት ወፈሬዕ ዕላቃት ዓም ለቂመት፡ ተዋልል መራቀብት አንበጠ ለትራቅብ ውቅል ልጅነት ህሌት እግልነ። እሊ ልጅነት ፈርሀት አንበጠ ተህሌ ወኢትህሌ እበ ኢከሰሰ፡ እት ሳምን ክል አትኒን ተአጅተሚዕ። እት ኩለ ወጠን፡ እብ ደረጀት መንጠቀት ወዐለም ለህለ ተዋልል አንበጠ እት ታቢዕ ህዩ፡ ለልኣትሐዘ መዳሊት እት ወዴ፡ ዶር ሰኒ ተአወሬ ህሌት። ለህሌት ሐብሬ ህዩ፡ ምን መሐብረት ሐረሰቶት አው ‘ሰካውት’ እንዴ አንበተት፡ አሰክ መክተብ ወዚር ለልሄርር ንዘም መትበዳዳል ሐብሬ ህሌ። እብለ መናሰበትመ፡ እግል እሊ ካድም ትሩድ ወመትሰባሉ ዲብለ ፊራር ዐጃይብ ላቱ ወቀይ ወዱ ለህለው ሰብ መቅደረት፡ አንፋር ዴሽ፡ እዳራት፡ መሐብረት (ሰካውት) ወመንዝመት ናይ እሊ ፊራር

ኩሎም እግል ሐምድ ሐዘ።

• እሊ ውዛረት እት ዐለሞት ሸባብ ምን ገብእ ወአንሳት ለባተ ሩእየት ሚ ትመስል?

- እሊ ውዛረት ሌጠ እንዴ ኢትገበኤ፡ ሰያሰት ሕኩመት ኤረትርየ እብ ዓመት፡ እት መሻረከት ሸባብ ወአንሳት ሕሰር ሰበት ቡ ውዛረት ሐርስመ መቅደረት ሸባብ ወአንሳት እግል ወቀሎት ልግበእ ወደማነት ነፍሶም እግል ተዓቤ እበ እሊ ትቀድር አብካት ወአርደት ተአግፌሕ እሎም። እትለ ላኪን ለነቅሰ ምን አለቡ በሀለት ኢትን። እብ ፍንቱይ ዲብ አንሳት፡ መሻረከትን ዝያደት እግል ወቀሎት፡ ክም አዳላይ መውዐሊ አጀኒተን ለመስል ጋራት እቱ እንሸቄ ህሌ።

• እሊ አዘ ለህለ ሀይክል ውዛረት ሐርስ ምን ምዶል ቱ ልትሸቄ እቡ ህለ?

- እሊ አዘ ለህለ ሸክል ምን 2011 እንዴ አንበትነ እንሸቄቡ ህሌ። ለዐባዩ አቅሳም፡ ቅሰም መታብዐት ወአድረሶት ሐርስ (Commodity based)፡ ቅሰም ክድመት ቀዋኒን ወመራቀብት፡ ወወጠንያይ መርከዝ ብሐሰ ሐርስ ዲብ ገብኤ፡ እግሎም



እንተ ትሸቄት።

• እት አከዶት ደማነት ነብረ ንትዐደዩ ለህሌን መራሕል ወሄራር ተጠውሩ ሚ መስል?

- አሰክ ሰነት 2012፡ እብ ክሰሰ አከዶት ደማነት ነብረ፡ እቱመ ህዩ እብ ሰበት አከዶት ደማን ኣካል ቱ ነህድግ ለዐልኩ ዲብክ ምን ገብእ ወእብ ደረጀት ዐለም። እሊ ውዛረት እት ሰነት 2013 “ሐድ፡ ንዘም በርናምጅ ሐርስ ዓይለት” ለልብል፡ እግል ኣካል፡ ሐምሌ ወፍራታት፡ ሐሊብ መዐር፡ ሰን፡ ቤጭ ወብዕድ ለሸምል በርናምጅ እብ አትበጋሱ ምን ‘አከዶት ደማነት ነብረ’ እት ‘አከዶት ደማነት ቅዝእ ለበ ነብረ’ ተዐዳ። እብሊ ህዩ፡ አሰክ ሰነት 2020 ሄረርነ። ምን ሰልፋያም አውረሐት 2021 እንዴ አንበትነ ህዩ፡ ለመጽኣ እተይ ሐርስ ካሬ ውብቀዕ ቅዝእ ለብእቱ ሌጠ እንዴ ኢትገበኤ፡ ክል-ዶል መትረክብ እግል ልግበእመ ሰበት ቡ፡ ምስል ውዛረት ርዝቀ በሐር እንዴ ትሳዳ። ምን ኩልያት እትለ መጃል እብ ብሕቶቶም ለልትሐሰር ሰብ መቅደረት ለትከምክም፡ ሐቱ ዲብ አንተጀት ሸፍር ጠቢቦት፡ ጠቢቦታይ ድድ ባልዲን ወሕማማት ለትሸቄ ወጠንያይት ልጅነት አቂምነ። እብሊ ህዩ፡ ምን 2021 ወእንሰር ፈልሰፈትነ እት ሐርስ ዲብ ‘አከዶት ደማነት ቅዝእ ለበ ነብረ’ ትወቀለት። ሰበቡ ምድርን ወእተይ ሐርሰነ እብ ኪማእያት ሸፍር ወደወ ባልዲን ሐቆመ ከሰሐ ወትመንከለ፡ እት ዓፍየት አዳም ምን ገብእ ወንዋይ ክምስልሁመ ዲብ ድዋር ለልኣመጽኡ ደረር ሰኒ እኩይ ወእብ ቀላል ለኢልትሳሬ ቱ።

• እሊ ለሀደግኩህ ተጠውራትና ፍገራቱ እት ፍዕል ከአፎ ህሌት?

- እትለ መደት ጎነ ውዛረት ሐርስ እበ ትወድየ እሎም ሰዳይት ልግበእ ወእብ ናይ ኖሶም በገሰ፡ ብዝሓም ሐረሰቶት ምን ሕኔት ዎሮ ጅንሰ ፍሬ ዘርእ፡ ዲብ ኩሉ ቅዛኣት ለብእቱ ንዘም አግቡይ ሐርስ ልትዐደው ህለው። ሕነ ህዩ፡ እግል እሎም ሐረሰቶት ምን ለህለው ዲብ ሓለት ሐርስ ምን እዴ ዲብ አፍ፡ እት ደረጀት ‘ሐድ፡ ንዘም በርናምጅ ሐርስ ዓይለት’ እግል ልእተው፡

ለልትከሰኣ እቱ መጃላት እንዴ ፈረገው፡ ለታርፎም ህለ ህዩ እብ መርሐለት መርሐለትኡ እት ለአታሙሙ እግል ልሄርሮ ሸሙይ ነሐፍዞም ህሌ። እግል መሰል፡ ዎሮ እት ገማል ሐምሌ ወፍራታት ለልትፈረር ሐረሰታይ፡ ዎሮ ናይ ለመድ ወአሮት ዘበናይ ቀፎ ንህብ ወምን ለአውሕድ 25 ሱሱታይ ምን ደወርህ እግል ለህሌ እሉ አርደት ነኣጠፌሕ ህሌ። እብ ምልሃዩ ህዩ፡ እት ተዋብ ሐ ጃሙሰ ወአግል ወአግጌዕ ለልትዐዳቡ አብሳር ለሐሰብ በሀለት ቱ።

• ዲብ ጠቢቦታይ አግቡይ ሐርስ እግል መትዐዳይ ገብእ ለህለ በገሰ ሚ መስል? ሚ ፍገሪት ህዩ ትትረከብ ምት ህሌት?

- አፍረየት ሸፍር ጠቢቦት ወደወ ባልዲን፡ ምን ነኣነብቱ ክልኤ ሰነትመ ዋዲ ምን ለህሌ፡ ሰኒ ለልኣትናይት መትቀዳም ለአርኤ ለህለ መጃላት ቱ። መሰለን፡ ለእብ ውዛረት ርዝቀ ዓሰ ለልትሰነዕ ናይ በሐር ሸፍር-ፊሻይ፡ እትለ መደት ጎነ ዲብ ወሬሕ 10 አልፍ ሊትር በጼሕ ዲብ ህሌ፡ እብ ቂድረት ሐርሰ፡ ሐረሰቶት ወገሌ መአሰሳት ፈሬ ለህለ ኮምፖስት ምን ወክድ ዲብ ወክድ እት ዘይድ መጽኣ ህሌ።

እምበልሁመ፡ ግማመት ቤት እት ሸፍር ጠቢቦት አው ኮምፖስት እግል በደሎተ ለነሰኣናህ ምስዳር ህዩ እት መጃል ሐርስ ክም ሰውርያይ-ተቅዩር እንርእዩ። ሰበቡ፡ እሊ እት ዓፍየት አዳም ወክሰሐ ድዋር ተእሰር እኩይ ተሐድግ ለዐለት ግማመት፡ እት እግል አዳም ለነፊዕ ሸፍር እንበድለ ዲብ ህሌ፡ ራሐት ደሚር ለትከልቅ ምስዳር ተ። አሰክ እሊ ሃድል ዮም ህዩ እብ ቅያሰ ሐድ እት ድዋራት አሰመረ፡ ምስል ውዛረት ዓፍየት እብ መትዓዋን እት እሰብዳልየት እሮተ እንዴ ትጀረበት ፍገሪት ሰኔት ሃይበት ህሌት። ለመጃል እብ ለትወቀለት ደረጀቱ እግል ንክደም ዲብ ህዩ፡ ምስል እዳረት አቅሊም ምግብ እት ንትሳዴ፡ ምን ሆቲላት ለትትጀመሶ ግማመት እት ሸፍር እግል በደሎተ ስታት ፋግር ህሌ። እት እንቀይሙ ህዩ እት ኩለ ወጠን እግል ልትጀረብ ቱ።



1^ኛ ክፍል


ለእት ሄለል ሰበምበር 1961 ለትዘበጠት ጠልገት ብሸራት መትኣንባት ንዓል ከፈሕ መሰለሕ ጀለ ተሕሪር ኤራትርዮ፡ ሸዑብ ሚልካይ ወጠኑ ናሱ እግል ልግበእ ቅድረት ክምቡ እብ ሓለት እንዴ ትተው ለነበር ሐቅ ክም ኢህለ ለተርኤ ዐለት። እምበል መትዳጋን እስትዕማር፡ መሳዋት፡ ፍቴሕ ወዐዳለት ጅትማዕዮት፡ መሳዋት ለክሰስ በርናመጅ ሲያሰት ዐለ እግል ልትበህለ ሀዩ ኢልትቀደር።

ድድ እስትዕማር አቶብዩ ሰውረት ቀንጸት፡ ጀብህት ተሕሪር ኤራትርዮ እት ሚዳን ኤራትርዮ ንዓል ክፈሕ መሰለሕ አንበተት፡ ክሉ ሸዑብ ኤራትርዮ ተለዩ፡ እብ ቃኑን ለኢትጵብጦ፡ እብ መዛህራት ለኢተሰምዖ እብ ባርት ወሐጺን ሌጠ ለልትሃጌ አባይ፡ እሳቱ እብ እሳት ወባርት ሌጠ ክም ትቀሰን እት ሸክ ኢጉብኡ።

ለሰውረት እግል ትዳብር



ዓጸተ ወግራህ ለጉብኡ ክሉ ሸዑብ ኤራትርዮቲ፡ አንሱ ወተብዑ፡ ንኡሹ ወበቢሁ። አንሳት አዳላይ ሴፊ ሙናድሊን፡ ሂበት ሐብሬ ወርፍዐት መስኡልዮት ናይለ እት ሐንቲህን ለተርፈዩ ዓይላት አደ ሸቅለን ገኡ፡ እብ ናሰን ሰለሕ እንዴ ረፍዐዩ እግል ልናድላመ ምራድ ዐለ እለን። ምናተ እብ መሻረከተን ለተርሕብ ጀህት ኢረክበዩ። ሰለሕ እንዴ ረፍዐዩ እት ድፊዕ ሸፈ ከቀትለ ወመይተ፡ ወመራር እንዴ ከሀለዩ ለወቅያመ እት ልብ ሙናድሊን ናይ ሰሳታት የዐለት፡ ወለትኸም እግል ለትግተብእ





ሲያሰት ኢረሰመ።

ምናተ ምር ስምዋ ናይ ሙጅተመዕ ግብአተን ኢተርፈ። ምነ እተ እብ ገበይ ሰላም ጉብኡ ለዐለ ንዓል ጀለ ተሕሪር ወጠን እንዴ አንበተዩ ሻረከዩ። እተ እት ሰነት 2016 ለትጠበዐ ክታብ ንዓል አንሳት ውሱቅ ክምለ እንረክብ፡ እት ዘበን/ሕክም እንግሊዝ ሕዳትመ ምን ገበኡ፡ ዲብ ሐንቲለ እግል ሕቁቅ እንሳንዮት ሸዑብ ኤራትርዮ እግል ልትጸገግ እት 05 ማዮ 1941 ለተኣሰሰ መሕበር ፍቲ ወጠን ለኣተዩ አንሳት ዐለዩ።

ኤራትርዮ ክም ብዕዳት ድወለ አፍሪቀ ሕርዮተ እግል ትርከብ ጉብኡ እት ዐለ ናይ ሸቃለ ወደረሰ መዛህራት ሰላምመ ግዴተን ቀላል የዐለት። እብ እተ መደት ለሀ ለዐለት ሕፍን ሓለት ሲያሰት፡ ፈዛዐት አንሳት ደቅብ ወዴት፡ ዲብለ እት ሰነት 1958 ለጉብኡ ፋዬሕ አሴራር ሰላም ሸቃለ ወኣብጠርት ሸቅል፡ ሸቃለ አዋልድ አንሳት መሻረከተን ዐባይ ክም ዐለት ልትኣመር። ሐቅሁመ ዲብ ሰነት 1957፡ 1960፡ 1962 እብ ደረሰ ለጉብኡ ናይ መቃወሙት አሴራራት ሻረከዩ። ዲብለ ናይ ሰነት 1965 ለዐበ መዛህራት ደረሰ፡ ጅዙእ ናይለ ሐረከት እንዴ ጉብኡ፡ መጦር ውላድ ተብዕን እንዴ አሴረረዩ እብለ አርኣያህ መቃወሙት፡ ብዝሓት ደረሰ እግል አወል መረት አረይ ሐብስ ወዝገዋ ጋብኣት ተን። እትሊ ሄራር ንዓል ተሕሪር ፈዛዐተን ወንዮት ንዓለን እብ ሐድረ-ሐድ መጦርለ ሐረከት ወጠንዮት ዐበ።

ለእብ ገበይ ሰላም ትጀረበ ንዓል ክም ኢተዐወተ እብ ሰለሕ እተ ተኣንበተ ንዓልመ እብ ዐውል ለኢትተመን ሐዞት አምደዩ። ሸዑብ ወጠን ለበኔ ሐልዮተን እግል ናሱ ጽዋር ብቆዕ ቲ። እብ እደዩን እት ልዋሕነ ሴፊ ሙናድሊን ለአዳልዮ፡ ምን መዓዋን ረዩም እብ ሐርብተን ሐኑክ ሙናድሊን ለአደም። እብ አገረን ከብድ ሃይዋት እት ልግዕዝ ምን አባይ ሐብሬ ለአመጸኦ ወእት ሙናድሊን ለልትለክክ ሐብሬ ለአበጸሐ። እቲ እግል ልትሐጨረ ምን ኢሐዘዩ ዳረን ወማለን ግረ እንዴ ሐድገዩ እብ ረሐን እግል ልትበረዐ ሚዳን እግል ልፍገረ ለልሐዘዩ እት በዘሐ መጽአዩ። ጀብህት ተሕሪር ኤራትርዮ ላኪን እግል እለ ትመጽኦ ለዐለት ሰውረት ናይ አፍካር ሐዲስ ዱሉሊት የዐለት። ሐቅ መሳዋት አንሳት ለክሰስ በርናመጅ የዐለ እለ ውሓዚህን ለተረኪ ንዮትመ የዐለት እለ። ገዲም ሙናድሊ አሕመድ ጣህር ባዱሪ ናይ ንዓል ዝክርያቱ እሩክ እቲ ዲብለ ሀለ “ኤራትርዮ፡ ሄራር ዝክርያት ንዓል” ለልብል ክታቡ፡ አንሳት ኢረትርዮ ለድቡእ ምነን ዐለ ባብ መሻረከተን እት ቅዋት ሐርብ እብ ናሰን እንዴ

ሰውረት ከብድ ሰውረት



ደረከዩ ክም ፈትሐያሁቲ ለፈሰር።

እተ ቀዳምያት 10 ሰነት ዕምር ሰውረት ኢረትርዮ፡ ሙናድሊን መብዝሐም ለዐለ እሉም ፈሀም ወለዐበው እብ ፍካር ወለት አንሳይት ቲለድ ወተግቤ፡ እት ቤት ንእሽ ሐንቲ ዋልዳዩ ወእት ቤት ዕበ ሐንቲ ብእስ ትትሐፊድ፡ ክም ህቶም ወደወ ትጉብኡ ለትሰረረተ፡ ቀራር መሰረ እት እዴህ ትመልክ፡ ምን ሸፍረ እንዴ አፊመት ሙናድሊት ትጉብኡ፡ ሐቅ ተኣርቴዕ ወእግል ሐቅ ዝሉማም ትጸገግ እት ልቦም የዐለት። ህተን ላኪን እለ አፍካር እለ እግል ልትቀየር ሐዘያሁ፡ እብ ዐመል እግል ልቀይራሁ ሀዩ ኣብ ናሰን እንዴ አሸክተዩ ሚዳን ፈግረዩ። ለቀዳምያት እት ሰነት 1967 እት ሳልሳይት መንጠቀት ጀብህት ተሕሪር ኤራትርዮ ለፈግረዩ ሙናድላት ጅምዑ፡ ረሕመ ወሰዓዳ ክም ልትበህለ እተ ክታብ ዝከሩ ሀለ። ክምለ ሙናድሊ አሕመድ ቤለዩ፡ እተ መደት ለሀ ለዐለ ሄራር ሰኢ ውሱቅቲ እግል ኒበል ይእንቀድር። ገዲመት ሙናድሊት ዘሀረ ጃብር እት መጀለት አግእዞ ዝክረቲ ክመ ሀሌት እት ደነግብ ሰሳታት እት አስመረ ዲብ እንተ ጁምዐ ዑመር፡ ራሕመ ሳልሕ ወሰዐድዩ ተስፋ ለልትበህለ ምሕርባት ሚዳን ክም ፈግረዩ ምናተ ለጀብህት አገድ ሶዳን ክም ነድኣተን ከበረን ሳምዐት ዐለት። ክል መንጠቀትክ እብ እንክረ እንዴ አሸክተዩ ባበ ለክርክሕ እግል ልናድለ ለልሐዘዩ ክም ለህልዩ እመርቲ።

ለአንሳት ክምለ ምራደን እት ሚዳን እግል ልዳይመ ወደረን እግል ልወቅለ ለተቀድረን አርድዮት ምን የዐለት ለትንክር ገይሱብዋር ጉብኡ። ምናተ ለዓቅለን ነብረ ቀይድ ዓዳት ወእጅትማዕዮት እንዴ በትከዩ እግል ሓርያት ባብ ከፍተዩ፡ እት አፍካር ተቀዩር ክም ለሐሰሴ ወደዩ፡ እት ከብድለ ሰውረት ብዕደት ሰውረት አፍካር ቀስቀሰዩ።

ሰውረት ሐር በልስ ለዐለ አፍካር ወመካይድ እት ቀበት ጀብህት ተሕሪር ኤራትርዮ እግል ለአርትዕዎ ለኢቀድረው ሙናድሊን፡ ምነ እንዴ ትፈንተው



ቅዋት ተሕሪር ኤራትርዮ ክም ከወነው እግል መሻረከት አንሳት ለባብ ክፋት ጉብኡ። ሰውረት እግል ትትነሰር ገኣት ምን ጉብኡ ክሉ ከፈፍል ሙጅተመዕ እምበል ፈናታይ ዲን፡ ጠበቃት ወቀባይል፡ አንስ ወተብዐት፡ እግል ልሻርክ እተ ብእቱ ምነ ልብል መብደኦ እግሉ ለከድም በርናመጅ ሲያሰት

ከጠጠት። እብ አሳስ እለ መሻረከት አንሳት ለመንዕ የዐለ። ምናተ እት ሰልፍ ሰብዓታት ለተንዘም እት ግድለ አድመኖት ሀለዮቲ ሰበት ዐለ እብ ሰበት መሳዋት አንሳት እት ሙናድሊኑ ለወደዩ አትፋዘዕ ሲያሰት የዐለ። መሻረከተን ላኪን አሰክ ክእነ ገብኦ ኢታኬት አዚመ ናሰ አሸክተት።

ሰወር፣ አብረሃም በየኔ

የም 23 ናይላ ሐልፈ. ወሬሕ ሰማን አንፋር ቅሰም ጀሪደት አስክ፡ አቅሊም ጋሽ በርከ ወእብ ፍንቱይ ምዴርያት ባርንቶ፡ ሀይቱተ ተሰነይ፡ ወአቅርደት ጀውለት ዋድያም ዐልኤ፡ ጀውለትነ ለአምበትነ እበ መዲነት፡ ባርንቱ እትገብእ እብ ሰበት ከደማት እጅትማዕየት፡ ዐማር እቅትሳድ፡ ተዕሊም ወሲያሐት ለክሰሰ ምሰል ከሰሶም መሰኡሊን ወሸዐብ አርዛቅ ሲያሐት፡ ዲብ አቅሊም ጋሽ በርከ ለክሰሰ ምሰል መሰኡል ቅሰም ሲያሐት አቅሊም ጋሽ በርከ አሰይድ ሓምድ ዩሰፍ (ወድ ሼክ) ወመሰኡል ፈሬዕ በሐሰ ወመራቀበት አርዛቅ ሲያሐ ወፕሮሞሽን ዲብ ቅሰም ሲያሐት አቅሊም ጋሽ በርከ አሰይድ ሰምረት ገብረመድህን ክሰልሁመ ምን መዲነት አቅርደት ላቶም አሰይድ መሕሙድ ሓሊ ወመሐመድብርሃን ኢብራሂም ለወዳኛ መቃበላት ሲያሐት ሀለ። ከእግል የም አልወኣይ ክፈል ልተላሊ፡



ደብር ኤሊት

አሰይድ ሓምድ ዩሰፍ እብ ሰበት ሲያሐት ዲብ አቅሊም ጋሽ በርከ ዲብ ልትሃኔ ክእነ ልብል፡ “አቅሊም ጋሽ በርከ እብ 16 ምዴርያት ለትአሰሳ ቱ። እለን ምዴርያት ለ14 በዲር ለጸንሐየ ወክልኤ እንዴ ተአከረየ ለትወሰከያ ሰልዓ ወክርክበት ተን። ከምሰልሁመ ብዙሕ እዳራት ደዋሐ ሀለ። እሊ አቅሊም እሊ እብ መጃል ሲያሐት እንርእዩ እት ሀሊን እምበለ ክል ሰነት ለለአፈርዩ ናይ ሐርስ እተይ፡ ናይ ጀራዲን ውብዕድ እግል ሲያሐት ለልሰሐብ ክም ሐርማዝ፡ ገታእ ውብዕድ እምበል አዱግ ከደን ክሉ እትሊ አቅሊምነ ሀለ። እሊ ሌጠ እንዴ ኢገብእ ብዕድ መባኒ ዲብ መዲነት አቁርደት ክምሰልሁመ ዋልያን ዲብ ካልኣይ ሐርብ እዲነ ልትነፈዕ እብ ለዐለ ድፍዓት እት ባርንቶ ወአቁርደት ሀለ። እሊ ዲብ ቀበቱ ሚ ሀለ ለኢልትአመር እብ ትሩድ ሐጺን ለትበነ ሰብ መቅደረት እንዴ መጽአው እግል ልብሐሱ ለሀለ እሎም ጋርቱ። እምበልሁመ ናይ ራእሲ ገርጀ ድፋዕ ሀለ ወዲብ ሻምብቆ ናይ ለመድ ከዛን ሀለ። ዲብ ምዴርየት ሀይታታመ ደብር ኤሊት ሀለ። ገቢል በዲር ዲብ እሊ ደብር እሊ እንዴ ገብአው ምን አባዮም ዳፍዮ ዐለው። እሊ ገቢል እሊ የም ምሰል ቆሚያት ከናመ



ወናረ ሐብራም ለሀለው ቶም። ዲብ ዘበን በዲር ዌረት መጽአዎም ምንገብእ ዲብ እሊ ደብር እሊ ልትሐበዮ ክምሰልሁመ ዲብ እንዴ ገብአው ምን አባዮም ዳፍዮ ዐለው። ክመ ዲብ ታሪክ ልደገም እተ ዘበን ለሀይ መሀድዩን እብ ወራር መጸኦ ምንመ ዐለው እት ርሽመት እሊ ደብር እሊ እግል ልፍገር ላኪን ኢቀድረው። ለደብር ለለትዐጅብ ቱ። እት ረአሱ ማይ ሲቶ ሀለ፡ መሕብዒ፡ ወመትሓረቢ ወናይ ታዕሊም አካናት ብእቱ። ምን ረዩም ትርእዩ እንዴ ሀሌክ ብለቅ ሌጠ መሰል እትኩ። ምን ቅሩብ ዶል ትርእዩ ላኪን ሰኒ ለልአትዐጅብ ቱ። እግል መደት አውረሐት እግል ልንበሮ ዲብ፡ ሴፋሆም ደቆ ወለአበሽሎ ዲብ ለዐለው አሳር ሰበት ሀለ ዲብ፡ እግል ሲያሐት ሰኒ ጀዛብ ቱ። እምበል እሊ ልሰዕ ለኢትበጽሐ ብዕድ አርድመ ሀለ፡ እብ ይዕርዮት ላኪን አስክ እሊ እግል ንብጽሐ ቃድራም ኢሀሌኑ። እትሊ አቅሊም ቤጽሐት መጽኦ እብ ፍንቱይ ውላድ ካርጅ ክም መሰል ዲብ እሊ ስምፓዚም ለቀደምናሁ ውዱሕ ሀለ። እሎም ለመጸኦነ እግል ቆምየት ከናመ ወናራ ሰኒ እብ መትዓጃብ ቶም ለሽርሕወን። ዓዳተን ናይ ህዳይ ወትልህዩ፡ ሐርስ ወመናበረት፡ ከምሰልሁመ ሐዘኖም

ሲያሐት ፎት-ፎቂዲም ግሽ-በርከ

ውብዕድም ክሉ እብ መትዓጃብ ልርእው። ክም መሰል ሕላየት ናይ ኩናመ ተሐሌት ምንገብእ ክሉ አዳምቱ ለለትሐረክ ለከወጅ ህዩ እሊ ዶል ልርኡ ምሰል ብዕድ ናይ አፍራቀ ትልህያታት ወሰሰዒት ቃሩት እብሊ ሰኒ ርቁብቱ” ልብል። ዲብ እሊ ወድ ሼክ ልብሉ ለዐለ ስምረትመ ክእነ ወሰክ፡ “ሲያሐት ዲብ ሰልፍ ምን ሰነት 2009 እንዴ አንበተ ክም ቅሰም ተአሰሰ። እሊ ፈሬዕ እሊ፡ እብ እዳረት ለደርሰው ወለትከረጀው ሽባብ ክም መጸውኑ፡ ሲያሐት ለልትሰሐብ አካናት እግል ፈረጎት፡ መቅደረትነ ለትሰምሐ ትሉሉይ ድራሰት እንወዴ ጸንሐኑ። ሐቆ እሊ ወዘረት ሲያሐት አሰይደ አስከሉ መንቀርዮስ ለትመርሐ መጅመብት ሰብ መቅደረት ውብዝሓም ሰብ ሰልጠት ለብእቶም እተ እግል ሲያሐት ለትፈረገ አካናት ዝያረት ወደው። እግልሚ እንዴ ተሐፈዘ ወትፈረገ ሌጠ ሕኔት በዋር፡ እግል አስበቶቱ ለሀደፈ ዝያረት ገብአት። ክም ምህም አካን ለእንቤሉ ክመ ወድሼክ ለሽርሐዩ፡ ደብር ኤሊት ዎሮ ምንቱ። እሊ ደብር እሊ ዲብ ምዴርየት ሀይቱተ ብልቱቢያይ ለትትበህል እዳረት ደዋሐ ዲብ ሀለ። እሊ ደብር እሊ እብ ታሪክ ዶል እንርእዩ፡ ዲብ ወክድ መሀዲዩን



ናይ ሱዳን እግል ለሃጅሞም እተ መጽእ እቱ ለዐለ ወክድ ክም ሳትር ወሕጌ ልትነፍዮቦ ለዐለው ቀባይል ኤሊት ቶም። እሎም የም ኤሊት እንብሎም ለሀሊን ሽዑቱ አዜ ዲብ ኤረትርየ ዲብ ሐድ ባካት ክም አለቡ፡ ፊሰኩ፡ ወለበዝሐው ህዩ አስክ ከሰለ ሱዳን ክም ጌሰው ቶም ድራሳት ለልአክዱ። ዲብ ደብር ጀምዐ ወመሳግድ ሀለ። እሊ አስክ እሊ ዲብ ደዋሐ ለልትረከብ ሽዑብ ዲብ ወክድ ዓያድ እንዴ ጌሰው ለልትሰለው ዲብ፡ ክምሰልሁመ ለበዐት አስክ 50,000 ሽዑብ እግል ትጽብዋ ለትቀድርተ ልብሉኩ። እግል አከደት ህዩ፡ አነ ኖሼ ግስክወ፡ እንዴ ግስካሁ ለተምም ኢኮን ለደብር። እግል ደብር ዶል ተሐፍሩ ህዩ ማይ ምን ለዐል ጸንሐኩ። ለትፈናተ አሳሰይደ ዕጩይ ወሐዋን ከደንመ ሀለ እቱ። ብዕድ ሳትር ደግያት ገርጃ ለልትበህል እት ምዴርየት ሞልቂ ሀለ። እሊ ሳትር እሊ ጀማዐት ደግያት ገርጃ ምን ዌረት ትግራይ እግል ልዳፍዕ ልትነፋዕ እብ

ለዐለውቱ። እሊ ዐጃይብ ለወድዩ ንሕሰ እት ረአሰ ንሕሰ ለትበናቱ። ዲብ ሰልፍ ናይ 20 ክፋል ዘበን ክም ትበነ ህዩ ልትአመር። አስክ እሊ ህዩ ግሩም ህለ ወአዳም ነብር እቱ ሀለ። ብዕድ ጠቢዕያይ ከዛን ዐሊ-ገዴ ለልትበህል ናይ ሻምብቆ ቱ። እሊ ከዛን እሊ ምን መሓዝ ብያረ እብ ገሰሞ ለመጽእ ማይ ምን መልእ። ሐጋይ እብ ተማሙ ህዩ እግል ንዋይ ወሐርስ ልትነፍዮ ምን ወዓሰ ለልአፈሩ ዲብ ከዛንቱ። እምበል እሊ ሃጸይ የውሃንስ ዲብ ፎዴ ለልትበህል ባካት ዝያድ 10 አልፍ ለገብእ ሽዑብ ኩናመ እንዴ ትቃተለ ለትከረ ዲብ መንጠቀት መ ሀሊት ዲብ ምዴርየት ባርንቶ። ብዕድ ዲብ መደት ሞልያን ተዕዲን ደሀብ ገብእ እቱ ለዐለ ናይ አውጋሮ ሀለ። ከምሰልሁመ ዲብ እሊ አቅሊምነ ለሀለ ከዛናት ክም ናይ ሲያሐት ንትነፈዕ እየም። ክም ከዛን ከርከበት፡ ገርሰት፡ ባደሚት፡ ፋንኮ ራዊ ወፋንኮ ጽሙእ ሀለ። እብ ዐቢሁ ህዩ መሓዝ ሰቲት፡ እሊ ሰነት እብ ተማመ ለዋሰል ቱ። ከምሰልሁመ ሳትርታት ሞልያን ናይ አቁርደት ወባርንቶ ሀለ። ዲብ አፍራቀ እት አወላይ ደረጃት ለልትርኤ ናይ ካልኣይ ሐርብ እዲና ቱ። እንዴ በጠርከ ወኣብረክ እግል ትልከፍ ምን ለትቀድር፡ አካን



ኮሌል ሓምድ የሱፍ



አሰይድ ስምረት ገብረመድህን

ልትሸቂ ምን። እብሊ እህትማም እግል ልትሀየቡ ለትአዜ። ዲብ እሊ አቅሊምነ ዐርኮካባይ ለበትክ አዳም ክም ቀትለ ልትርኤ። ሐርማዝ ለቀትላመ እሊ ከምሰልሁ፡ ሰበት እሊ ለክሰሶም ጃፃት ወሸዐብ እብ እህትማም እግል ልጽቦጡ፡ ሕነ ክም ለትከሰሰ ጀህት እብ እህትማም እንሸቂ ዲብ ሀሊኑ። ከምሰልሁመ ስምዋ ከዛናት ለሀለ ጀራዲን ክም ናይ ሲያሐት እንርእዩ። እምበልሁ ናይ ሐርማዝ ሕዝአት አው ቀትረ ጋብእ ለሀለ ባካት ምን እንርኤመ እብ እህትማምቱ ለእንርእዩ። ብዕድ ዲብ መደት ሳልሳይ ወራር ወያኔ፡ ወያኔ እሊ ባካት ጸብዋ ዲብ ለዐለ ወክድ ዲብ ሻምብቆ ወቶምብዩ መቃብር ሹሀደእ ለትሐፈረ ዲብ ወሐር ለአሰኔናሁ እብ እህትማም ወክም ታሪክ እግል ቤጽሐት እዱልያሙ ለሀሊናነ ቱ። እሊ ቀብር ምሰልክ ናድሎ ለዐለው ወዲብ ዐውቱ ለአብጸሐውክ ሕፍረት፡ እግል ሽዑብ ኤረትርየ አክልኣይ መሪር ክምቱ፡ እሕትራሙ እግል ሹሃዳሁ ሰኒ ቃሊ ክምቱ ለለርኤ ጋርቱ። ዲብ አቅሊም ጋሽ በርከ ክል



መሓዝ ጋሽ

ዋናብ እግል ቤት ከምሰልሁመ ዐካቱ እግል ትብለዐ ሌጠ እንዴ ኢገብእ፡ ዲብ መሳንዕ እንዴ ትለክት ክም ሰደፍ ውብዕድ ምህም ሓጃት

ምዴርየት ናየ መቅበረት ምሐርበት ሀለ ዲብ፡ እሊ ናይ እለን ክልኤ አካን ላኪን እብ ፍንቱይ እንገንሐን። ዲብ ገጽ 10 ልተላሊ...

ሸባብ

ነጃት ዑሰማን



መናድሊን ማሌ

ሸዑብ ኤረትርፑ፡ ምን 1940ታት እንዴ አንበተ እለ የም ራክበ ለሀላ ሰላም ወመስከብት እግል ልርከብ እንዴ ቤለ እት ቅብላት መስተፅምረት ምህሮቱ ሰደ። ሰበት እሊቱ ንዳል ሰለሕ ለአንበተ። እሊ የም ምን ጂል እት ጂል ዲብ ልትዋረስ ገደሰ ለሀላ ታሪክ ሰባት ወኤማን፡ ዲብ ሰነት 1961 እብ ፋርስ ሓምድ እድረስ ዐዋቱ፡ ወሑዳም አንፋር ወዕሰብ አሰሊሐት ክም ከረ ኡብወሸረ አሰተብደ ወየም እሊቱ ታሪክ አጅያል እንዴ ገአ ልትሐላለፍ ነብር ሀለ።

እለ አርደትነ፡ በሐርነ፡ ዐድነ፡ ወወጠን'ን እት እንብል እብ ሕሽመት ወሐበን፡ ለንትሰሜ እበ ክፋል ዐለም፡ ናይነ ናይ ኤረትርፑን ለእንብለ እቡ ሰበብመ ትዕቤ ወትንኦሽ ምንሕትነ ምን ኡብዕቦታትነ ቀዳምያም ለጸንሐተነ ምን ገብኦት፡ ወእለ እግል ኢህብ ተበን ቃሊ ምን ደፍዐነ ዲባ ቱ።

ምንሕትነ ለእንብሉ ሸይ፡ አሳሱ ታሪክ ሌጣ ቱ። እግል መሰል ናይ ብሕተ ሸርከት አው መአሰሰት “ዌርሳየ አናቱ” እንዴ ትቤ፡ እት ቤት መሕከመት እንዴ ቀርብከ ትሸከ፡ ዌርሳይ ክም እንተ አከደት ላቡ እሰባት ናይ ብሕተትክ አው ታሪክ እኩድ ለአትሐዜክ። አምበሌሁ ላኪን፡ ዌርሳይ እግል ትግበእ ኢትቀድር። እብ መጅብ እለ እንርእየ ዲብ ሀሌነ፡ ምን ክም እንተ ለለአክድ ሀይ፡ ታሪክ ክምሰልቱ ልተአመር።

ሕነ ሀይ ዌርሰት ናይ እለ ደውለት ለገብኦነ እቡ ሰበቡ እለ ታሪክ እለ ብሕታነ ምን ገብኦቱ። ሀሌዮትነ ሀይ ለሐልፋ ታሪክን ለአሰብቱ እግልነ። እብ ገበይ ሐጫር፡ ሚልከት ናይ እለ እግለ

እነብር ሀሌነ ምድር ወበሐር ለሳብት ታሪክ ቀዳምያም ወልዴናቱ። እግል ወድ አዳም ምን ሐዋናት ለፈንትዩ አሳስያይ አው መፈንትያይ ጋር ሚቱ ዶል እንብል፡ ታሪክ ሌጣ ቱ።

አዳም አሰሊቱ ለዐልብ ሌጠ እንዴ ኢገብእ፡ ለቀዳምያም ዋልዴን እግል እለ እዲነ ከአፎ እት ባሰሮ ሓልፋመ ክምቶም ለአምር። ታሪትም ለአትፈክር ወለአትመራምር፡ ዓዳቶም ወነባሪም ሀይ ልትወረስ ከናይ ገብእ። እብሊቱ ሀለዮትነ ነአመርዴ ወናይ መስተቅበልነ በርናምጅ እንቱልም።

አዳም ለሐሰብ፡ ልትሃጌ ወሓሪት ለአዳውር። ሐዋንመ ለሐሰብ ወለአዳውር ገብእ፡ ምናተ እግል ሓሪት ለልሐሰብ ኢኮን። ክምሰልነ በሌዕ፡ ሰቱ ወርሑ እግል ለአንግፍ ጀርብ። ሐዋናት ታሪክ እግል ልሸቁ ኢቀድር፡ ምናተ አለት ናይ ሸቃይ ታሪክ አደሚ እግል ልግበእ ቀድር።

ታሪክን ለእንብለ፡ ናይ ንዳል አው ሐቆ ሕርየት ለሀላ ተዋልል ሌጠ ኢኮን። ናይ በዲር ታሪክ ቅሰሰ ዋልዴነ፡ ወአሳር ቀዲም፡ አሳሰ ታሪክን ወወጠንየትነ ለለአክድ ቱ። እለ ለእንሸቁ ዲቡ ሀሌነ በር ወበሐር፡ እብ ደረጀት ዐለም ምን ቅያሰ ወለዐል እሰትራተጅያይ ሰበት ገብኦቱ፡ ዋልዴነ እብ በር ወበሐር ለመጽአየም ወራራት እግል ልዳፍያ ቃሊ እሰትሸሃድ ዳፍዓም ቶም። እለ ምድር ሰኔ ሀይ እብ ተአሰትህል ለትሀየቤነ ኢኮን። ረዩም እንዴ ደእንገይቤ፡ እት ዘበን ምስተፅምረት እት ዘበን ዋልያን ረሐም እንዴ ሰበለው ሰብ ታሪክ፡ አቤነ እግል እሰትፅማር ለቤለው ኤረትርፑን



ዌርሰት ዮም

ሕፍዝ እግል ነትጋይሰ ወብዕድ ዐጃይብ ላቱ ታሪክ እግል ንወሰኩ እለ በሀለት እብነ ሸባብ የም ሐዲስ ታሪክ እግል ንሸቁ ሀለ እግልነ። ዌርሰት ሌጠ እንዴ ኢንገብእ፡ ዴቅቤት ምን ክሉ ለሳድፍ መሸክል ወመውርሰት እግል አጅያል ሐዲስ ክም ሕነ መስኡልየት ናይ ኩልነ ክምቱ ኢንትረሰዕ።

እብ መጅብ ፈዛዐትነ እት ክል ምጅተመዕ ክልኦት ንዕ ወድ አዳም ለትረከቦ። እለ ፍንቲት እለ እት ምጅተመዕ ሸባን ዝያድ ዋድሐት ቱ። ለተረት ፈዛዐት ወዋውር ሕሳብ ላቡ ሻብ፡ ክል መረት እብ ሰበት ሸዑብ ወወጠን መስኡልየት ረፍዓም ሰበት ገብኦው፡ ለጾር ዲብ መሸንገሎም ሌጠ ቱ። ምን ናይ ኖስ አው ናይ አሸነሰ መሳልሕ፡ ወጠንያይ ሸቅል ወስታት ሙጅተመዕ ለዐቤ። ለእብ ፈዛዐቶም እት ካልኦይት ደረጀት ለልትረከቦ ሀይ፡ ዝያድ እት ናይ ኖስ መሳልሕ ለአተንከቦ።


ታሪክ ሰባት ወኤማን

ሐዳም ኢዐለው።

ናይ 1940ታት ወ1950ታት እብ ሰላም ወቃኑን ለትጋየሰ ሰያሲያይ ንዳል ሀይ አተላላይ ናይ እለ ወጠንያይ ታሪክ ገብእ እት ሀሌ፡ አሳሰ ናይ አሰፊሁ ለአተላለ ታሪክ ንዳል ሕርየት ቱ። እለ ለምሰል ሰብ ሐለት ወመቅደረት አሜሪካ ወእተሓድ ሶሼት ለትጋብሀ፡ ሕርየት ለአምጸአ አጅያል ንዳል ሓዚ ሕርየትቱ። እለ ቃሊ ዐውል ለትደፍዐ እሉ ወጠንያይ ታሪክ ለአውረሴነ ሀይ ለመናድል ገቢል ወሰውረቱ ቱ።

ናይ ሐቆ ሕርየት አጅያል ሀይ እግል ዐቂብ ሰያደት ወጠኑ እብ ፈራሰት ወዐጃይብ እግለ ታሪክ ደግመዉ ወአሰበተው። እብላ ሀይ እት ዓቅቤት ወአድመኖት ሰያደት ወጠን ዐባይ ተረት አግደው። እለ ክሉ እግል'ን ሸባን እብ ተጃረት ለትመለኦ ውርስ ታሪክ ቱ። እለ ታሪክ እለ ምን አየ መጽኤነ? እብ ከፎ ሰብ መልክየት ናይ እለ አርደት ወበሐር ወዐቢ ታሪክ ክም ሕነ ለለአክድ እግልነ እለ ልትወረስ ለሀላ ሳብት ታሪክ ቱ።

ዌርሰት ናይ እለ ወጠን ሕነ እብ ግብኦትነ፡ ታሪክ እለ ወጠን እለ ሀይ፡ እንዴ ተሐሰርነ እግል ንሐዋጡ ወንወረሱ ወእብ ዐቢሁ እብ ሰበቱ



መናድሊን ማሌ

እሎም እግሎም እንቤ ክልኦት እትጀህ፡ ክሎም ክ'መ ምን አሮት ርሕም ለፋግራም፡ እግል አሮት ሀደፍ ለሸቁ ምን'ማ ቶም፡ ለመስኡልየት ላቱ ዲብ መሸንገለ ሸባብ ቱ። እምበል እሊመ፡ ለአሮት ናይ ቅሩብ ኬድማይ፡ ዌርሳይ፡ ፊፍዓይ እማነት፡ ገብእ ዲብ ሀሌ፡ ለካልኦይ ሀይ፡ እት ፅምር ሸበት እብ ሐለቱ ወአፍካሩ ዲብ ሀለ ለከድመ፡ ለአሰተሸሀይ፡ ለመስከነ፡ ወእግልነ ሸባን ለአውረስ ወሀለዮት እለ ወጠን ለአክደ ፋርስ በዐል ኤማን፡ መእንብታይ ንዳል፡ ውሕደት፡ መውርሳይ ታሪክ መናድል ቱ።

ለንትሃጌቡ።

እምበል እሊመ፡ ለሐልፊ ታሪክ ለለዐቅብ ወወርሴ ለእለ ራፍዕ መስኡልየት ክም ዐቢ ጋር እግል ልርአየ፡ እብ ክሉ ጋራት ሕሰር ወፋህም ዶል ገብእ ቱ። እብ ክለ እለ ቡ አምር ወመቅደረት እብ መትሐሳር ዶል ከድም፡ ገበይ ተጠውር ወዐቦት አምም ክም ሀለ ልትአክድ እግልነ። ወጠንያይ ሻብ፡ እግል ምጅተመዕ ወወጠን ቀደም ርሑ ለልርኤ እት ለዐቤት ዐቦት ወዐማር እምበል ጠሚዕ ሐለቱ ወአፍካሩ እግል ደሐን ወጠን ወሚርሒት ምጅተመዕ ወእብ ፍንቱይ እብ ተጋቢብ ወጠን፡



ዌርሰት ዮም

ምን እሎም ክልኦት ዌርሰት ምን ቱ ወጠንያይ? ምንቱ ዌርሳይ? ምንቱ ፊፍዓይ እማነት? እለ አሰእለት እለ እት ረኣሰነ መጽእ። እለ አሰእለት እግል ንብለሰ ደውለት ኤረትርፑ፡ እብ ረዩም ወመሪር ንዳል ወቃሊ እሰትሸሃድ ወምሰክ'ን እንዴ ትደፈዐ ዲብ ለመጸኦት ደውለት ክምተ ለታሪክ ለአሰብት እግልነ።

እብ ሰበት ኢአምር ወሀመሌ፡ ለመጽእ መሸክልመ ሑድ ኢኮን። እለ ሀይ፡ እት ክሉ መጅተመዓት ዐለም ለሀላ ቱ። ክም ፈሀምከ ወሕሳብከ ሀይ ልትፈናቱ። ወጠንያይ ነፈር ለልትበሀል ሀይ እብ ፈዛዐቱ፡ ዐቅሉ፡ ከሃለቱ፡ ሰብሩ፡ ወረዩም ለለሐሰብ ሌጣ ቱ። እግል ርሕዩ እንዴ ቤለ ለኢሐሰብ፡ እግል ምጅተመዕ ናሴሕ ወዕጹም ኬድማይ ወእግል ወጠን አምን ወሰላመት ለፈቱ ወለአደምን ዶል ገብኦቱ ለወጠንያይ ነፈር እንዴ እንቤ

አትመሞት ወአትመቃርሐት ወጠንያይ አህዳፍ እግሉ ዶል ከድም ቱ።

ናይ ሰለሰ መራሕል መሪር ንዳል በሀለት ቀደም ሕርየት፡ ዓቅቤት ሰያደት ወሐቆ አድመኖት ሰያደት ሓለፍነ። አሰክ ዲብ እለ ሐዳሰ መርሐለት ለትዐዴነ ዲቡ ወቅት ሀይ፡ እግለ እብ ነፍሱ እንዴ ትበረዐ ታርኩ ወሀለዮቱ ለአሰበተ በዐል መባዋር ማሌ ወየም ለእንብሉ ሻብ፡ ወእግለ ንዳል ሰለሕ ለአንበተ ወአሰክ የም ታሪክ ሐበን ለአውረስ ወለ አሰበተ፡ ለናደለ ወጠንያይ ሻብ፡ ምን ቅያሰ ወለዐል ዐባይ ሕሽመት እግል ነሀቡ ለአሰትህል። ከሸባብ ዌርሰት ወመውርሰት ክም ቶም እንዴ ኢንትረሰዕ፡ እብ መስኡልየት ክም ሸቁ እግል ልግብኦ ወእት ካድም ወጠኖም ምኖም ለልትጠለብ እግል ሊደው ለወዴ፡ ለእብ ፅምር ወተጃርብ ለዘይዶም ቱ።

ዴማት፡ ለትፈናተ ኩቱብ ታሪክ

እግረ ሮሽንል ዌርሳይ ዐራት ምንም ነክሰ። ባክለ ምስጢርለ ሐካኪቶ ክም ሀለ ርሐ ተአሰሉሉ ዐለት። አምዕል ሐቲ እግረ ምስጢር ክም ለአግሥት ሸክ ዋዲ ይዐለ። ከእት ፍንጌ ፈርሀት ወሰእየት ሰኒ ዋዕም ላተ ለዘት ለአትዳውር ዐለ። አምዕል ሐቲ፡ ፍንጌ አልዐሴረት ወአመቃርብ፡ ሐፋነትለ ጸሓይ ገርቡ ሰበት ፈተየ፡ እተ ግንራራብ ኒል እድሩሩይ ለዐለ ድበዕለ ሮሻን እቲ እት ልትዛወር፡ ሐቲ መለክየት ላተ መርከብ አሰክለ ሰላልምለ ጅኔነት እት ትትጸገዕ ረአየ። ወምን ሐረስ እግል ልትከበተ ለመጽእ ነፈር አሮትመ ይዐለ። ሻፍግ እት እንቱ አሰክ አተጀሀ - ክምሰልሁ እግል ልውዱ ዋጅቡቱ፡ ለሕሹም ጋሻይ እግል ልትከበት ቅብላትለ መርከብ ዶል በጥረ ለሀይአቱ ክመ እተ ትምሳል ለግሩም ትመሰል ዐለት።

ዶል አቅመተ፡ መላኢከት ለትመሰል ሸንብሬበት ልባሰ አሚረት እንዴ ለብሰት ምን መርከብ ትከሬት ከእበ ሰልም ገጸ ለዐል አሰክለ ሮሻን እት ፈግር፡ ምስለ ጀላግ ግርመተ ወለ ቀሊላይ ገርቡ፡ አሬባይ እት እንተ ገጸ ለዐል ትትናፈር ለህሌት ትመሰል ዐለት። ሰኒ ምን አቅመተ እለ ኢኮን በዐለ ውቅልት ሕሸመት አሚረት ሚሪ ሲ ዐንኽ ረአ!

ለሰይፋ ረዩም እሉ ሐርጠ ከሰላም ዐስከሪ ወደ እለ። ለአሚረት ክመ እተ ሕልም እበ ቀደሚሁ ሐልፈት። ወእተ ዶል እተ ቀበትለ ድበዕለ ሮሻን ተሐበዐት ምነ።

እለ ሀ.. ሀተ.. ሀታተ ሚኢኮን?

ዕንታትመ ዶል አሮት ለሐሴ። ወእዘንመ እተ ክምሰልሁ። ልብ ላቱ በታተን ሐሰት ኢለአግምር። ከእለ ሀተ ምን ኢትገብእ ላቱ ለልቡ ዐደድ እለ አሰክ ምነ አነኩ እግል ልንፈር ለሐዜ ወኢሀንደገ እለ። ምናተ አፎ ኢሸዐረት እቡ ወኢፈቅደቱ? እሊ እት ፍንጌህም ሓሰል ለዐለ ጋር ምን ፈቃዶ ወለዐል ለአሰትህል ዐለ። ለመርኢቶም ለዐጂብ ለሀይ ሐቲ ዶል ትረሰዐቱ በህለት ቱ? መክብር እቡ ትትረሰሰዕ ህሌት?

ወምን ትፈቅዱ ወኢትፈቅዱ ህዩ ሚ ፋእደት እግል ልርከብ ምናቱ? ለሱረት ህዩ ናይ እለ አሚረት ትግበእ ወለናይ ሐቲ እለ ትመሰል ሚ ፍንቲት ብዲበ? ላመ ልቡመ እግል እለ ግርም ሱረት ቱ ሌጠ ለሀንደገ። ምን እለ ወሐርመ ህተ ሱረት እለ ወለት ፈርዐን ላተ አሚረት ትግበእ ወለ ሱረትለ ወለት ድጌ መነፍ ላተ ሸምብሬበት ትግበእ ለልቡ እግል እለ ሱረት እለ



ሌጣቱ ለሀንደግ ለሀለ። ወእለ ትግበእ መሉሀ ምን ክልኢተን ሰእየት በትከ። ከለሻም ላቱ ደሩራቱ። ወላመ በቲክለ ሰእየት እተ ክምሰልሁ።

አሰክለ እተ ቀደሚሁ ኬን ወእንሰር ሸቱት ለዐለ ዕጪይ አትቃመተ። ለሰራይር ጨቅብሪቅ እት ልብል ወለአቅሹንለ ዕጪይ ኬን ወእንሰር እት ለሀናድዱ ወምን ቅሸን እት ቅሸን እት ልትናፈር ረአየን። ለሓለተን ወለ ለውቀተን እት ፍንጌህን ለህሌት መሰንዮት ወፈተ ተአርኤ ዐለት። እብ ሰበበን ቀደም እለ ለኢለአግሥት ሸዑር እቡ ሸዐረ። እምበል ሕሳብ እት ልተልሀየ ወእምበል ዐዛብ እብ ሻም ወፈተ እት ልትመተዐ። ሀመት ትግበእ መሸክ ክም አለበን ዶል ረአ ለሓለተን አቅነአቱ። እግል ለቡብሱ ወለበድለቱ እብ ለትፈናተ ሓባረ ወለ ካቤለቱ ዶል አቅመተ እብ ቅብብ ርሕ ሰበት ሸዐረ፡ ሸንሀት ናይ ሰሓቅ መሪር ወመጠጠት ለትአወዴ ተርጀገት ትሰመዐቱ።

ላከፎት ከወኒ ወአርምሐት ተማም ተዐለመዩ። እት መሲክ አፍሩስ ህዩ ለልትዓደሉመ አለቡ። ወእት ክምተ አሰዩፍ ህዩ ምን ለዐል ኩሉቱ። ኩሉ መንደላይ ለልተምነዩ ሐቅ ረክበ ሚ ነቅሰት ምነ። ምናተ እሊ ባዲ ለሀለ ልቡ እግል ልብለሰ ላተ ሐለት ሰአነ! ናፈ በክቱ ሰኒቱ። ማነ ለኩሐል ዕንታተ ወጭቀረ ሐነብረ ለበጽሕ እለ ሀደ። ኹኔመ ህዳይ ክም ዋጅብ ናይ ዲን ሰበት ለሐሰቡ፡ ቅሰመቱ ለሀበቱተ እግል ልህዴቱ። ህቱ ላኪን እት ልቡ ሻም ዋሙም ሰእየት ለአበትክ እንዴ ረፍዐ እግል ልንበር ቱ። ወክመ እተ ዕጪት ለማይ ኒል ወበርሀት ጸሓይ ሰእነት እግል ልትጨራመዋቱ።

ሐቅ እላመ እተ መባዋሩ ለቀዳም ሌጠ ሐጠጠ። ወርሐ እብ ሓርያይ መርኢት መስኢት ሀበዩ ወአትሳጅዐዩ። ላመ ዝያረት ለአሚረት ወዴተ ረሰምየት ክም ይዐለት ሸክ ኢወደ። ክምሰልሁ ምን ኢተዐሌ ኩሉ እተ ሮሻን ለሀለ አዳም ወአመረ። ወእግለ ዓይለት ለመለክየት ለተአሰትህል

ሕሸምት ወናይረት ከብቱ ወወደው እለ። እለ ምን ገብእ፡ አዜመ አሰክለ መርከብ እብ በይነ ክም ተአቀብል ሸክ አለቡ። ገሌ ምነ ሕሳባቱ አማን ገብአ እሉ። ለአሚረት በዐለ ውቅልት ሕሸመት አሰክለ ባብለ ሮሻን ክም ሳርሕዩ እበ አሰረ አቅበለት።

ደደፍ እተ አነክቱ እተ ሰልምለ ጅኔነት እንዴ ትዳለ በጥር ዐለ። ዶል ለእተ ባኩ በጽሓተ ሰይፋ ሐርጠ ከሰላም ዐስከሪ ወደ እለ። አመተ አለቡ ለአሚረት ብጥር ትቤ ከእብ ጀላል ወክብር ውልብ ቴሉቱ። ከትተርጀግ ለህሌት እት መሰል ክም እለ ቴሉቱ።

- ስመዕ የሀ ዛብጥ። ዋጅባትከ ሚ ክምቱ አክል አሕድ ተአግሩ ማሚ?

ደደፍ እንክሉዕ እት እንቱ። - መንባይትዬ በዐለ ውቅልት ሕሸመት። ሰኒ አምሩ።

እብ ህግዩ መራር ትሰአለቱ። - እት ዘመን ሰላም አዋልድ እግል ትቃጭፍ ዋጅብ መሰለክ? ረብሸት ገበአት ዲቡ። እግል መደቲት ግንሐት ዋፍዐት ተሐይሰ ገንሐቱ ወክም እለ ቴሉቱ።

- ጅንዲ እት ሸቅል ከያነት እግል ልትፈረር ዋጅብ መሰለክ? ለህግያህ ሰበት ገድኦቱ ወመትሐማለ ሰበት ሰአነ ክም እለ ቤለዩ።

- መንባይትዬ .. ዐስከሪ ሓጥር እት ከያነት ኢልትፈረር! እት ትተርጀግ እቱ ትሰአለት።

- እብ ምረሐር ዕጪት እንዴ ተሐበዐ፡ እግለ እትድሐናት እት እንተን እምበል ትልህያህን ከበር ለይዐለ እለን አዋልድ፡ እብ ብራቃተን እት እንተን ለረሰም ነፈር ህዩ ሚ ወቴልካሁ?

ለህግያህ እንዴ ሸወከተ ወገጸ እንዴ አሰረት ክም እለ ቴሉቱ።

- እግል ተአምረ ለብእትከ፡ ለሱረት ሐዝዩ ህሌት።

ደደፍ ክመ እተ ጠቢዐቱ ጣይዕ እት እንቱ፡ ለእዴሁ እተ ነሐሩ እንዴ ሎሸዩ፡ ከለሱረት ምነ

ምሕበዐ እንዴ አፍገረዩ እግለ አሚረት ሰለመዩ።

እለ በታተን ትታከዩ ይዐለት። ከምሰል ኩሉ ለክብረ - ለውዲቱ ሰኒ ክም አትፈከረተ ለገጸ ኢሐብዐ። ምናተ ሻፍገት እት እንተ ረሐ እንዴ ትማለክት ለእዴተቲተ ማርዩት እንዴ መደት እግለ ሱረት ትከበተተ።

ከጀላል ክብረ ወግርመተ ሰሩጊት እት እንተ አሰክለ መርከብ አተጀሀት።

ኑባብ

ፍትነት ዐድ ባቅል ተአበዴ

ዎሮት ነፈር ጅኔታይ እት ልትዘቤ ጸንሐዩ። ለጅነ እምበል ፍትነት ክልእ ሐቲ ዴበትመ ይዐለት እሉ። ህቱ ህዩ እለ ብዙሕ ክም ዱብ ኢሐሰበዩ ከእግለ ጅነ ትዛበዩ። ለጅነ አምዴላቱ ክም ሓለፈ..እግለ እሲት መንባሁ ክምእነ ቤለዩ፡ “መንባዬ፡ እሲት እግል ልጽመር እትኪ ናዊ ሀሉ፡ ወበታተን ክም ኢፈቴኪ እት ክል-አካን ዳግም ሀለ። ከእግል ልርሐም እትኪ ወምነ እሉ ሳትት ሀለ እግል ለዐቅብል ዶል ሐዜኪ፡ ዶል ለእለ ሰክብተ ላመት እንዴ ነሰአኪ ከምነ ተሓትለ ሸከሙ ሐቤታት ጭገራት እንዴ ላጼኪ ምስልኪ አኪበን።” ለእሲት እለ ክም ሰምዐት ለጅነ አማኑቱ እት ትብል እግል ረሐ ሐሸክሸክት፡ ወክምለ እለ ትበሀለት እግል ትውዴ ብእሰ አሰክ ሰክብ ትታኪ ዐለት።

ለጅነ ሐቅ እለ ዲብለ ብእሰ እንዴ ጌሰ ከክምእነ ቤለዩ፡ “መንባዬ እሲትከ እግል ትትካረጅ ምንክ ናውየት ሰበት ህሌት፡ ዮም ላሊ እግል ትሕረደክ ዱሊት ህሌት። ሐቅ ኢተአምነኒ ለአማን እብ ኖሰክ እግል ትርአዩ ፋዜዕ እት እንተ ትሰኪከብ እለ ወራቅቤ፡ ሓጀት ለእበ ተሐርደክ እት እዴሀ እት እንተ እተ ምስካብክ እግል ትምጸአነቱ።” ለመንባሁ አምነዩ፡ ምድር ላሊ ክም ገብእ ለእሲት ላመተ እት እዴሀ እት እንተ ምነ ሐንለ ሸከም ብእሰ ሐባት ጭገራት እግል ትላጼ እት ተአትጫፍር መጸት። ለእናሰ ትሰኪከበ እሉ፡ ወምስል ነፍሱ ሐጊገት ተ እለ ለሕጻን አማኑቱ ቤለ። ለእሲት ላመተ እንዴ ጸብጠት እትለ ወሪዱ ዶል ደነት እብ ግሳዩ ገብእ ወለላመተ እንዴ አትሐደገዩ ሐርደዩ እቤ። ዐደ ዶል መጽአው ወለቶም ማይተት ክም ጸንሐቶም ህቶም ህዩ እግሉ ቀትለው። ወእብ ሰቡብ ፍትነትለ ጅነ ፍንጌ ክልኦት ለዐድ በአሰ ጀረ ከእብ እደይ ሕድ በደው። ከምን ፍትነት ለለአኪ አክይ-አደብ በታተን ይሀለ። ወፍትነት ህዩ ዐድ ባቅል ተአበዴ።

ተበሰም

አርት ዐረብዩቱ ትሰረቀት ...፡ አምዕል ሓሪት ተማም ሕጽብት ወነዲፈት እት እንተ እተ አነክተ እት በጥር ረክበዩ። ፈትሐዩ ክምን አቅመተ ጀዋብ ክሩይ ረአ። ለጀዋብ ፈትሐ ክም ቀርአዩ፡ “ኢትጽባዎ እትዬ፡ ለውዳዩ ሰኒ አሰፊኒ፡ እሲትዬ ትምሕጥ ሰበት ዐለት፡ ዐረብዩት አሰክ እሱባዳልየት እነሰአ እበ ሰበት ሰአንኩ፡ እባ ቱ ለዐረብዩትክ ነሰአኩ። መሕገዝ ወዴኒተ ዐፌ ምንዩ፡ ወእለ ዐዘመትዬ እግል ትትከበት ምንዩ እሰኤከ።

አነ ሰበት ዐግብኩ እግል ትሳምሐኒ ምስልዬ ሲነመት እግል ትርኤ ዓዝምክ ህሌት፡ ወእለ ተዛክር እግልክ ወእግል ዕያልካ ቱ” ትብል ዐለት። ለእናሰ ምን ክትር ፈርሐት ምነ ዕንታቱ ልትደፈ ለዐለ አናቤዕ እት ማሰሰ ክምእነ ቤለ። “ያረይ እለ እዲነ አሰክ እለ እብ ኬረ ሌጠ ህሌት።” አምዕል ሓሪት ህቱ ወዕያሉ ሕድ ከምከመው ወተዛክሮም እንዴ ነሰአው፡ ፊልም እግል ልዕፈው ሲነመት አተው። ዶል ለዐድ አቅበለዋተ ቤቶም እንዴ ትሰረቀት ጸንሐቶም፡ ወእተ ጣውለት ጀዋብ ክሩይ ጸንሐቶም። ለጀዋብ፡ “እንሻለ ለፍልም ዐጅቤኩም ማሚ?” ልብል ዐለ።

ልእክት ውዛረት ተዕሊም እብ መናሰበት 8 ሰብተምበር እድንያይት አምዕል አብደዮት ቅዌት

“ደቅብ አብደዮት ቅዌት፡ እግለ እት መዐደዩት ለህሌት ዐለም፡ ብንዩት አሳስ ሰላም ዳይመት መጅተመዕ”

እድንያይት አምዕል አብደዮት ቅዌት እት ዐለም ዮም 8 ሰብተምበር ትትዘክር። እት ዐድነ ዮም ዓመት እግል 22ይት ኢነተ እት ዐለም ህዬ፡ እግል 58ይት ኢነተ ትትዘክር ህሌት። ፈቂድ እለ አምዕል፡ እት ፈዓልየት አሸቃል አብደዮት ቅዌት ወበርናምጅ ዐረዮት እብ ፍንቱይ፡ ተዕሊም እግል ዐባዩ ህዬ እብ ዓመት፡ ለትአከደ ሄራር እግል ልትሐፈዝ፡ ወለነቅስት እግል ነኡትምም፡ መትፋቀዲ ወአትሐዳስ ገለድ ቱ ለሀደፈ።

እድንያይት አምዕል አብደዮት ቅዌት ሰነት 2023፡ እብ ደረጃት ዐለም፡ “ደቅብ አብደዮት ቅዌት፡ እግለ እት መዐደዩት ለህሌት ዐለም፡ ብንዩት አሳስ ሰላም ዳይመት መጅተመዕ - Promoting literacy for a world in transition –Building the foundation for sustainable and peaceful society” ሐንቲለ ትብል ስቅራት ትትዘክር ህሌት። እለ ልእክት እለ፡ ብቀዕ፡ ወሐቅፋይ አሳስ ተዕሊም እግል ኩሉ ዲብ አከዶት አብደዮት ቅዌት አስክ እለ አሀምየት ዐባይ ክም ቡ ተሐብር። አብደዮት ቅዌት፡ ፊህም ፋዬሕ ዲብ አስበቀት ወአትናያት ምህም አሳስ እግል ትሉሉይ ተዕሊም ወዐቦት፡ አግደ ህዬ እት አስረቶት ሐገሌብ፡ ዐቦት እጅትማዕየት ወለትሳዌት መሻረከት ዲብ አከዶት፡ ምህም ዓምል እት ተጠውር ዳይም እት ኩሉ ዕምር ኣደሚ ለልሄርር ተዕሊም ቱ።

እተ ሐልፈዩ ክልኤ ሰነት፡ እለ ዕለት ዲመ እግል ልትዘክር ወእግል ልትሸቂ ዲቡ እተ ለአስትህሉ ስቅራታት ትዘክርናህ። ዲብ ሰነት 2021 ለዐለት ስቅራት፡ “አብደዮት ቅዌት ወኣደሚ ለመርከዘ ሐቶት፡ ወአጭብቦት ፈርግ ዲጂታል” ለትብል ዐለት። እላ እብ ወሳይል እዕላም ወቴክኖሎጂ ሐብራ ለትሰዴት ወራት አብደዮት ቅዌት እግል አትኣታይ ወአፍይሐት ለትሰንድ ልእክት ምህመት ዐለት። ናይ ሰነት 2022 ስቅራት ህዬ፡ “ተቅዩር እት መራክዝ ተዕሊም አብደዮት ቅዌት” ለትብል እት ገብእ፡ አካናት ተዕሊም ወበቃዕት መሻቀዶታቱ ዲብ ፍገራት ተዕሊም ለቡተ ሐዞት ለትከሰስ ዐለት። እብ ዓመት እለ ልእኩታት እለ፡ አሀምየት ለቡ ወእት ወቅቱ ሰበት ዐለ፡ ምስል እለ ልእክት ዮም ዓመት እንዴ ጨመርን እግል ንሸቂ እቡ ወንፍቀዱ ለወጅብ ክም ቱ ውዛረት ተዕሊም ተኣትፋቅድ።

ምን አቃሊም ለትረከበት ሐብራ እሕሰእ ክመ ተአፍህመ፡ እት ናይ 2022/2023 ዓመት ምህር፡ እብ ዓመት 38,969 ዐባዩ (90.5 ምእታይት አዋልድ አንሳት)፡ እብ 2,461 መደርስ እት ልትዐለም፡ ዲብ 1009 ንቀዋ አብደዮት ቅዌት እንዴ ትሰጀለው ደርሰው። ሐድ 70 ምእታይት ምን ትሰጀለው ህዬ ለትሰተት እሎም ምህር አትመዋቶም ለልኦትናይት ቱ። ምናተ፡ ለትረከ

አትካራም ወድህር መሻረከት ውላድ ተብዕን አሰባቡ እግል ልትፈተሽ ወእግል ልትሰዩሕ ለቡ ቱ። ኩሉ ለትሰርገለ ወራታት፡ እተ በክት ራክብ ለኢጸንሐ አድህይ መጅተመዕን ለረከዘ ሰበት ቱ፡ ነቲጅቱ ሰኔት ቱ። እለ ህዬ ለምን ሰነት 2015 ወእንሰር፡ “እት ድዋራትን ድጌ ቃዊ እግል ኢህሌ እብ መቅሬሕ ንሸቂ” ለትብል ስቅራት እንዴ ታሉ፡ ለሸቂ ለትመሳነ ተዕቢኣት ፍገራቱ ቱ። አዜመ እተ ለኢትበጸሐ ወአብካት ተዕሊም ለኢረክበ አድህይ እንዴ አተንክብኩ እግል ንሸቂ ቱ።

ወጀዶት በርናምጅ ዐረዮትመ፡ (ምን 9-14 ሰነት ለዓማሮም አጀኒት) ምስል ብዞሕ ነዋቅሱ ፍገራት ሰኔት ለትረከበት ምኑ በርናምጅ ቱ። ምን አቃሊም ለትረከበ ናይ 2023 ተቃሪር ክመ ለሐብሩ፡ እትሊ በርናምጅ እለ፡ 22,656 ደረሰ ትሰጀለው፡ 16,467 ምናም ህዬ (72.7 ምእታይ) ምህርህም አትመመው። እትሊ መሻረከት አዋልድ 44 ምእታይት ቱ። እለ መሻረከትን ድህር ሰበት ህሌት፡ ሸቅል ትሩድ ክም ለአትሐዜ ተአሸር። ምን መድረሰቶም ለአትመመው እብ በቃዕት ሰኔት ሐልፋም ለህለው ሐዳም ሰበት ቶም ህዬ፡ ሸቅል ትሩድ ለሐዜ ለህለ ለኢለአስክብ ጋር ቱ። ዲብ በርናምጅ አብደዮት ቅዌት -ምህር ዐባዩም ለሐላት እተ ክምሰሌሃ ቱ።

እትሊ ወክድ እለ እት ዐድነ ምን ዐግሎ ተዕሊም በረ ለህለው አግሩዝ ብዝሓም ቶም። ሰበት እለ በርናምጅ ዐረዮት እብ ትሉሉይ ወእት ዋጅብ፡ እበ መሰኢት ለትገብእ እቱ አግቡይ ጀሳብ እግል ልሸቂ ቡ፡ እብ አፍረዐት ወዛረት ተዕሊም አቃሊም፡ መራቀበት እግል ትግበእ እቱ ወጅብ። እምበል እለ እት ዐድነ ለገብእ ናይ ምህር በክት ለኢረክበዩ፡ እት ረዩን ወለ ይውጡይ ባካት፡ ለህለዩ ዐዶታት ብዝሓት ክም ህለዶመ ለልትአመር ቱ። ሰበት እለ እት ክእን ለመስል ባካት፡ በራምጅ አብደዮት ቅዌት ወዐረዮት እንዴ ትፈሪ። እግል ምዋጥኒን ምን ተአሲር ናይ ሐገሌብ ወመድንጋር፡ ክምስል ልትነጀው ውድየት እብ መትኣያስ እግል ልትከደም እቱ ለወጅብ ወጠኒያይ ህደፍ ቱ።

እት ዐድነ ፈዓልየት ወራታት አብደዮት ቅዌት እግል ዐባዩ፡ ምን ሰነት 2000 እንዴ አስተብደ፡ ለልትአከድ አው ለልትበጸሕ አህዳፍ እንዴ አንጸራቱ ለትበገሰ። እለ አስክ 2015 እግል ልትአከድ ለተሐሰበ አው ሰእየት ለገብኣት እቱ፡ ህደፍ አው መባጽሕ፡ ቅያስ አብደዮት ቅዌት፡ ዲብ ሐድ 15 አስክ 10 ምእታይት ክርየት ለልብል ዐለ። ክምስልሁመ ፍንቲት ቅያስ አብደዮት ቅዌት ፍንጌ አንሰ ወተብዐት ዲብ ምተሐት 10 ምእታይት ናይ ክርየት ዲብ ደንገበ ህዬ ክምስል ልትመጣወር ለአመመ ዐለ። ወራታት አብደዮት ቅዌት እብ መደቃብ ወእብ ትሉሉይ ሰበት ገብእ፡ ለዲብ ሰነት 2000 ጽቡዋ ለዐለ መባጽሕ አው ህደፍ፡ ፍገራት ክምስል ትረከበት ምኑ ትጌመመ፡ እለ እብ ድራሳት ለተለ እግል ልትኣከድ፡



ለወጅቡ ምንማቱ፡ እትሊ ወክድ እለ፡ ቅያስ አብደዮት ቅዌት እት ኤራትርዮ፡ ሐድ 85 ምእታይት ክምቱ ጌመም ህለ። እለ ናይለ ገብእ ለትመቅረሐ ወለኢልትሐለል ካድም ቱ።

ለዲብ መጃል አብደዮት ቅዌት አስክ እለ፡ ለተሰርገለ ወራታት ለልትሐመድ ምንማ ቱ፡ ዲብ ለትፈናተ ድዋራት፡ ደጉስ ቅዌት እግል ኢልሳድፍ ለለአፈርህቱ። ሰበት እለ፡ እግል ክሉ ለከሰሱ እብ ፍንቱይ ህዬ እዳራት ደዋዬሕ ምስል መሻቂቶም፡ አብ መቅሬሕ እግል ልሸቀው እቱ ወዛረት ተዕሊም ትትሳኪ። ምር ምን እትሊ መጃል እለ እብ እህትማም እግል ልትከደም እቱ ለወጅብ ወራታት፡ መክተባት መዐዩ እብ ድዋር ድዋሩ ክስተት፡ ወናይ ቅራኣት ለመድ ክምስል ለህሌ እግል ልትከደም ለአስትህል።

እብ ደረጃት እዲ፡ ቅያስ አብደዮት ቅዌት፡ እብ ጅንስ ልትረኤ እት ህለ፡ አንሳት 82 ምእታይት፡ ተብዐብ ህዬ 90 ምእታይት ክምቱ ልትዋገም። እለ ናይ 8 ምእታይት ፋዬሕ ጋግ ቱ። ዲብ እለ ወክድ እለ ዲብ ሐላት ዐድነ ሐቆመ ተንክብኩ፡ ድራሳት ሰበት ኢገብእ እቱ እብ ዋዴሕ ለልትአመር ኢኮን። ምናተ፡ ለዲብ 2008 እብ ውዛረት ተዕሊም ለገብእ እግል ቅያስ አብደዮት ቅዌት እብ ለከሰስ ክምስል ለሐብር፡ ፍንጌ ናይ ክልኢቱ አጅናስ ናይ 17 ምእታይት ፈርግ ክም ዐለ፡ ለለአሸር ቱ። ዲብ እለ ለኣተላለ ሰኒን፡ ዲብ ኤራትርዮ መሻረከት አዋልድ አንሳት፡ እት መራክዝ አብደዮት ቅዌት፡ እት ክል ሰነት ዝያድ 80 ምእታይት ዲብ ልሰጀል ጽንሐቱ ለለኣትናይት ቱ። ዲብ እለ ለጸንሐ ጋግ እግል አጭብቦት ዶር ክምስል ቡ ሸክ አለቡ። ምናተ ለፈርግ ልሰዕ ክምስል ኢትመጣወር፡ እት ወግም እንዴ ኣቴ፡ እግል ሳወዮቱ ዲብለ ተሌ ሰናታት እብ መቅሬሕ እግል ንሸቂ ውዛረት ተዕሊም እብ ድግማን ተኣትፋቅድ።

ልእክት ናይ እለ አምዕል በገ፡ መትቀዳም ወራታት ተዕሊም እግል ዐባዩ ወበርናምጅ ዐረዮት እቱ እንዴ ተሓፈዝኩ፡ አተላላዩ አከዶት ብቀዕ ወጀዶት ተዕሊም እግል ምዋጥኒን እት

ፍዕል እግል አውዐሎት ንሸቂ ለልብል ቱ። እብ አሳስ እለ ዐሸም ወመሻረከት ምዋጥኒን እት አብደዮት ቅዌት፡ እት ለሐይስ ገይሰ ህለ። ለዐበ ተሐዲነ ሳኪን፡ ዲብ ፍገራት በቃዕት ተዕሊም ልትረኤ ለህለ ሕውና ቱ። ሰበት እለ፡ ለበክት እንዴ ኢረክብ ለጸንሐ ድዋራት፡ በክት ለረክብ እቡ አግቡይ ዲብ እንክልቅ በቃዕት ተዕሊም እግል አስዮት ለለአቀድር ምስዳራት እግል

ንሰኣት ወመራቀበት ገለድን እግል ነትሐድስ ውዛረት ተዕሊም እብ ድግማን ትትሳኪ። እብ ሰበብ ቅዌት ለልትትሐደድ መቅደረት ልገብእ ወአፍረዮት ምዋጥኒን ነሀውን።

“ዐቦት ወመትቀዳም እብ ተዕሊም ወተእሂል”
በኪት መኣንበት ሰነት ድራሳት ሐዳስ 2023/24
ውዛረት ተዕሊም 8 ሰብተምበር 2023

ሰያሐት እት አቅሊም ጋሽ-በርከ

ምን ገጽ 7 ለተላላ


ዲብ ሰያሐት እብ ዕሙማይ ዶል እንርኤ ብዙሕ ህለ፡ ምናተ ለህለ እግልክ እግል ተኣትአምር ጀርቤ ዶል ገብእ ሰኒ ቱ። ቀደም እለ ሰያሐዩን ናይ ጀርመን ወፖላንድ እብ ብዝሐ መጽኢን ዐለው፡ ህቶም ዝያድ ለለአህተም እቡ፡ ምን እለ ክሉ እግል ሰያሐት ለትበህለ፡ ዲብ ቆምየት ኩናመ ቶም ለረክቡ። እብሊ እንተ ለህለ እግልክ ተኣዳሌ ወለ ጋሻይ ምኑ ለልሐዝዩ ሕርያን እግል ሊዴቱ ለሐሴ። እብሊ አስክ እለ ሕን ብዙሕ ባካት ዲቡ ድራሳት ዋድያም ለህሌን ወልሰዕ እብ ለትፈናተ አሰባብ ለኢበጽሐናሁመ ታርፍን ህለ።

ፎዴ ለልትበህል ባካት ናይ ቆምየት ኩናመ ልሰዕ አስክ እለ እንደርሱ ህሌን። እብ እንክርኩም ከማን ክምሰለ ምን ራስ ቁሳር አስክ ራስ ዱሜረ ለልብል፡ ለትቀደመ በርናምጅ እግል ትውደው ህለ እግልኩም። እግልሚ ለህለ እግልን ዲብ በሐር ሌጠ ለትሐደደ ሰበት ኢኮን። እትሊ ለሐልፍ ወክድ እብ መፈወድየት ዓዳት ወርያደት ለትነዝመ እግል ንትሓፈዝ እቱ ለወጅብን እንዴ ትደረስ እግል ልትሐፈዝ ዲብ መዲነት አቁርደት እጅትማዕ እግሉ ለገንሕ ጋብእ ዐለ። እለ ህዬ እንዴ ተአመረ ሰኒ እግል ልትሐፈዝ፡ እለ ምን መደት ትርክ እንዴ አንበተ ለትበን እግል ሰያሐት ምህም ላቱ። እለ ጋብእ ዲቡ ለህለ ድራሳት ምኑ ወኬን እግል ልትደረስ ክም ለአትሐዜር እያመ ህሌን።

ብዕድ መዐስከር ሳወር ኢነ ምንገብእመ፡ መርከዝ ጠወርት ሸባብ ሌጠ እንዴ ኢገብእ፡ ለዋልዴን ውላዶም እግል ልርአው ለገዩሱ ክም መጃል ሰያሐት ርኤነሁ ምንገብእመ፡ ሰኒ ለለትዐጅብ መጃል ሰያሐት ቀበት ዐድ ንትከበት ክም ህሌን ለልአርኤ ሰበትቱ ምን እንደርሱ ለህሌን ለልትፈንቴ ኢኮን። እለ ለእሉ እቤ ዲብ መስወደትን ጸብጣሙ ለህሌን እት ገብእ፡ እብ ተማሙ እለ ዲብ ጋሽ-በርከ ለህለ መሓዛት ሳኪን ክም ናይ ሰያሐት ለንትከበት እቱ እንዴ ወዲን ልሰዕ ዳርሳሙ ኢህሌን። እብ ውዛረት ሐርስ እትሊ ጃርዲን ህለ ወዲብ እለ ገምለ ክህለ እት ልትበህል ለልትሸራሕ ሌጣቱ ለክም ድረሳት ጸብጣሙ ለህሌን። እብ ዐቢሁ ህዬ ንዋይ ተዋብ ህለ። እትሊ አቅሊም ብዙሕ ንዋይቱ ለህለ፡ እለ አቅሊም እለ እብ እክል ሌጠ እንዴ ኢገብእ ለእንርእዩ፡ እብ ንዋይመ ሰኒ ርዙቅ ክምቱ እግል ነኣብሪህ እንፈቱ።

እለ አቅሊም እለ ግድለ ንዳል ሸባብ ኤራትርዮ ለአንበተ ዲቡ አቅሊም ቱ። አድብር አዳል ሸሂድ ብ/ጅነራል ሙሰ ራብዓ ኣክም አቅሊም ጋሽ በርከ እተ ዐለ እቱ ወክድ፡ አስክለ ደብር እንዴ ፈገርን ለደረሰናሁ ብዙሕ ቱ። ለንዳል ምን ባካት ድዋራት አሸለ ለልትበህል እንዴ ግሰን ሰበት ደረሰናሁ ክም ወሲቀትለ መደት ለሀ አባይ ዶል መጽኢም ከኣፎ ወዱ ክም ዐለው ጸብጣሙ ህሌን።

ልተላሌ.....



ጅግራታት ማውገቴን ባይክ እት ሸዋሬዕ ጸጸራት ገብኦ



እብ መናሰበት መዳላይ እግል ዱር አቅሊም ምግብ፡ ለሐልፊት ሰንበት ንኢሽ ጅግረ ማውገቴን ባይክ ወዳኻርሶ እት ባካት መቅበረት ሹሀደኡ ጸጸራት ገብኦ። እት ምዕል ለሀ፡ ምን ዓማር 13-

14 ሰነት፡ እት 37.5 ኪሎምትር ልትጃግሮ እት ህለው፡ ምን ፈሪቅ ሳሊና ሴም ሀይሌ ተወወተ ዲቡ። ተመስገን አስመርም ወሻሎም አለም ምን ፈሪቅ ትጽቢት፡ ሮቤል ዳንኤል ምን ገዛ ባንዳ፡ ፍሬሰላም

ሙሴ -ምን ትጽቢት፡ ወላሚክ ኪዳኔ ምን ገዛባንዳ፡ አሰክ ሳድሰ ተርቲብ ለአተው ቶም። ደርቦም፡ ዓማር 15 ወ16 እት መሳፈት 41.4 ኪሎምትር ትባደረው። ሚልክያስ ዳንኤል

(ወድ-ዐሰብ)ምን ፈሪቅ ትጽቢት ህይ፡ እግል መትጃግረቱ እብ ለትአትፈክር በቃዕት እንዴ አጅገረ፡ አወላይ አተ። ደርቦም ወላድ ፈሪቁ ዳይሞን ሰለሙን ወሰናይ ተኸሰቱ ለአቱ እት ህለው፡ ዮናታን ተሰፊት ወሻም አማን ምን ፈሪቅ ሳሊና ወሳምኤል ዮአሃንስ ምን ጽንዕት ህይ አሰክ ሳድሳይ ተርቲብ ጸብጠው። 54 ኪሎምትር ምን ገልበበው ዓማር 17 ሰነት ወምለዐሉ፡ ዮቤድ ኤፍሬም - ጎዳይፍ እት ልትወወት፡ ኖህ ተክሌሀይማኖት - አርባዕቱ አስመረ፡ ኤስሮም ያቀብ - አክርዮ፡ ሚልክያስ ጸሃይ - ጎዳይፍ፡ መድሃኔ ዘርኢት - ትጽቢት፡ ንፍቃሌም ኤፍሬም - አክርዮ ህይ፡ ደርቦ ለአተው መትጃግረት ዐለው። ደርብ እሊ ጅግረ ዐጀላት ወላድ፡ 44 መትባድረት ለሻረከዩ ዲቡ ብድረ ዐጀላት ማውገቴን ባይክ አዋልድ ተሰ። ምን አዋልድ አክል እሊ ብዝሐ ጅግረ ዐጀላት እግል ልትረኤ እሊ ናይ ሰልፍ ቱ። ለሰበብ ህይ፡ ለዲብ ግራሱ ሩት ሹርካት ለአስመዛዩ አዋልድ

እዳራት ምዴርያት፡ እት ፍረቅ እንዴ ትነዘመዩ ምን ሻረከያ ቱ። ለታርፋት ህለዩ እዳራት ምዴርያት መሻረከተን እግል ለአዘደ ፊን ተህየቡትን። እትሊ ብድረ ዐጀላት፡ ሲዶና ሀብቱም ምን ሰራይር ሳዋ እት 45 ኪሎምትር ለትወወት። ወለት ፈሪቅ ሲልሻና ወልዴሚካኤል፡ ቤትኤል ክፍላይ - ፈሪቅ ጽንዓት፡ ሃና አየሌ -ጋላ ነፍሐ፡ ሊደዩ ተክኤ እብ ብሕቶት፡ ሰምሃር አብርሃም - ምን ፈሪቅ ጽንዓት ህይ፡ ደርብ ከዋ ሰበት ኬደዩ ምን ካልኣይ አሰክ ሳድሳይ ተርቲብ አተዩ። መትባድረት ዐጀላት ሸባን ዳኻርሶም እት ምዕል ለሀ ደሚር ለረዬሕ ጅግረ እት ለአርኡ፡ ናትናኤል ተሾሚ ምን ፈሪቅ ጽንዓት ዲብ ልትወወት፡ አዶናይ ቃልኣብ - ምን ፈሪቅ ናትና፡ ኪዳኔ ምሉእብርሃን እብ ብሕቶት፡ አቤል ሳሚ ምን ፈሪቅ - ናትና፡ ማቲዎስ በርሄ ምን ፈሪቅ ኤራቴል ወዳንኤል መሓሪ - ምን ንስሪ ህይ፡ አሰክ ሱሳይ ተርቲብ አተው።

ተእሂል ባድሚንተን እት አስመረ ልትህየብ ሀለ

ወጠንያይ ፈደሬሽን ተምመ ተሐበረ። ባድሚንተን፡ ለሀይቡ ለዐለ ናይ 1ይት ደረጃት ተእሂል ክም እሊ ተእሂል፡ ምን ኩሉ አቃሊም ዐድኑ አቅሊም ሳዋ ወውዛረት



ድፊዕ እበ ትፋገረው 25 አንፋር እግሎም ልትህየብ ሀለ። እትለን መጽኣነ ለህለዩ አምዳላት ቅሩብ ህይ፡ እብ ኢንሰትራክተር ማትያስ ክፍሎም እት ልትቀውድ እብ ሸፊሕ ወፍዕል እግል ልትህየብ ቱ። እምበል እሊመ፡ እትሊ ተእሂል እብ ዐውቱ ለሐወጸው ዳርሳም፡ እት ምን እድንያይ ፈደሬሽን ባድሚንተን (BWF) ለነድኡ ኢንሰትራክተር (መሓድር) ለሀይቡ ተእሂል አወላይት ደረጃት ሩክሰት እግል ልሻርኩ ክም ቱ እሙር ሀለ።

ሻምፕዮንስ ሊግ

**** ፈሪቅ ፓሪስጄርማን ተረቱ እት በርሳ ልትፈዴ ****

እት ሐልፈት ሰንበት ዐባይ፡ ምን ገጽ ሳሊ ምን ገብኦ ትልህያታት ሻምፕዮንስ ሊግ በሀለት አብጣል አርቤ ለዲብ ፍንጌ ክልኦት ሀረሚት ፍረቅ በርሰሎን ወፒኤስ ጂ ለገብኦት ትልህየ ሰኒ ድቅብት ዐለት። ልዩነል ሚሲ እብ ጀህት በርሰሎን ቅባል ኤምባፔ እብ ጀህት ፒኤስጂ በሀለት ቱ። እት 27 ደቂቀት በርሰሎን ሚሲ እበ አተዩ እሎም ጎል መርሐው። ምናተ፡ ፒኤስጂ ዩኤስኤስዩ እሎም፡ እት 32 ደቂቀት ክልያን ኤምባፔ ጎል አተ ከኡብ ተዓድል 1-1 እግል ዕርፍ ፈግረው። ሐቆ ዕርፍ ላኪን፡ በርሰሎን ዲብ ምርት ጎሉ ዩብሱ፡ ወፒኤስጂ ህይ ዲብ 70 ደቂቀት እብ ሞይሴ ኪን ምር ጎል፡ ወ ዲብ 65 ወ85 ደቂቀት ህይ ኤምባፔ ክልኦት ጎል ሰበት አትዐረ፡ እግል ርሐ ሃትሪክ ወእግል ፈሪቁ 4-1 ክም ቀልብ ወደ። ቀደም እለ እት ወደወ ትልህየ ላኪን፡ በርሳሎን እግል ፒኤስጂ 6-1 ቃልብ ሰበት ዐለ፡ አዜመ 6-5 ህቱ መሬሕ ሀለ።

ፕሪመር ሊግ እት 4ኛ ሳምንቱ

ለድቁብ ፍረቅ ፕሪመርሊግ - ደውለት እንግሊዝ እትሊ ምውስም 2023 ናይ ራቤዕ ሳምንቱ ትልህያታት እትመም ሀለ። እትሊ 20 ፈሪቅ ለሻርክ ዲቦን ክል ሳምን ለገብኦ 10 ትልህየ፡ ገሌሁ ፍረቅ ለዐርግ እት ገሌ፡ ገሌሁ ህይ እት ዝናበት ልትሰሐብ ትርእዩ። እበ እት ሐልፈዩ ጅምዐት ወሰነብት ለገብኦ ትልህያታት፡ ዌስትሃም እግል ሉቶን ታውን 2-1፡ ማንቼስተር ሲቲ እግል ፉልሃም 5-1 እብ ርሐብ፡ ኖቲንግሃም ፎሬስት እግል ቼልሲ 1-0፡ ቶቲንግም እግል በርንጎይ 5-2፡ ብራይቶን እግል ኒውካስል 3-1፡ ክሪስታል ፓላስ እግል ዎልቭስ 3-2፡ ሊቨርፑል እግል



አሱቶን ቪሊ 3-0፡ ወአርሰናል እግል ማንቼስተር ዩናይትድ 3-1 እንዴ ቀልበው፡ ክል-ምኖም ናይ ሰለስ ንቅጠት መክሰብ እት ጀናቢሎም ካርያም ሀለው። እምበል እሊመ፡ ንቀዋ

ለትካፊለ ፍረቅ ብሬንትፎርድ ወቦርኔማውዝ 2-2፡ ቪፊልድ ወኤቨርተንመ 2-2፡ ፍኑቲያም ሀለው። ማንቼስተር ሲቲ አሰክ እለ እት ወደዩን አርበዕ ትልህየ



ሰበት ኢትቀለቤ እት ሰበረት ፕሪመርሊግ እብ 12 ንቅጠት ሸንን እት ሀለ፡ ደርቦ ፍረቅ ቶቲንግም፡ ሊቨርፑል፡ ዌስትሃም ወአርሰናል እብ ዐሰር ንቅጠት ወመትፈናታይ አግዋል ለአሲር። አሰክ እለ ቃልግም ለይህለው ፍረቅ ህይ፡ ሉቶንታውን ወበርንጎይ እብ ዜር ንቅጠት እት ዝናበትለ ሊግ ልትሰሐብ እንረክቦም።

0ድነ ነአምር
አቅሊም ዐንሰበ

ምን ዝሕረት ማህረጃን 2023



አቅሊም ዐንሰበ ዲብ ቅብለት ምውዳቅ ጸሓይ ኤረትርየ ለህለ ዎሮ ምነ ሰስ አቃሊም ኤረትርያ ቱ። እብ ቅብለት ወቅብለት ምፍጋር ጸሓይ ምስል አቅሊም ቅብለት በሐር ቀየሕ ናይ 201.8 ኪሎሜተር፤ እብ ግብለት ወግብለት ምፍጋር ጸሓይ ምስ አቅሊም ምግብ ናይ 26.7 ኪሎሜተር፤ እብ ምውዳቅ ጸሓይ ወግብለት ምውዳቅ ጸሓይ ምስ አቅሊም ጋሽ በርከ ናይ 303.8 ኪሎሜተር ለሪሙ ሕዱድ ቡ።

ለበዝሐው ሰነን አቅሊም ዐንሰበ ትግሬ 61%፣ ትግርኛ 21%፣ ብሊን 18%፣ እት ገበኤ፣ ለበዝሐው በህለት 69% ዲብ ብሩር እብ ሐርስ ወርዕዮ ለልትናበር፣ 31% ዲብ መዳይን ወሽብህ መዳይን እብ ናይ አምዕላይ ወራታት ሽቅል ለልትናበር ቶም።

ሓለት ጀው አቅሊም ዐንሰበ ዲብ ሰለሰ ልትከፈል፣ ህቱ ህዩ ሕፋን ምግባይ ወበሩድ ቱለል ጀው ሽምል።

ዕልብ	አግርኢኮሎጂ	ግልባቤ (%)
1.	ይቡስ አው ሕፋን ቀላቅል	8.43
2.	ጥሉል ናይ ሮረ አድብር	52.01
3.	ጥሉል ምውዳቅ ጸሓይ መዳንን	13.50
4.	ሽብህ ብሩድ ምግባይ ሮረ	25.91
5.	አክደር መዕጽየት በሐር	0.15

ዕልብ	ምዴርየት	ትግርኛ	ትግሬ	ብሊን	ብዕድ
1.	ሐጋት	25.50	46.68	32.21	0.61
2.	ሐልሐል	1.43	72.74	25.65	0.19
3.	ዐድተክሊዛን	69.90	30.58	0.18	0.34
4.	ከረን	36.69	35.93	26.14	0.95
5.	አሰማጥ	1.11	97.39	0.15	1.34
6.	ዔለበርዕድ	67.52	17.85	20.43	0.20
7.	ገላብ	1.71	97.89	0.29	0.11
8.	ሐመልማሎ	2.84	67.91	34.02	0.23
9.	ሀበሮ	0.78	90.04	0.11	0.07
%		20.78	60.98	17.74	05

አርዛቅ ሲዮሐት
አቅሊም ዐንሰበ እብ ናይ ዓዳት ወጠቢዐት ውርስ ሰኒ ርዙቅ አቅሊም ቱ። ናይ በዲር አሳር ክም ደብረ በዓል ወቅሮ እመን፣ ታሪካይ አካናት ክም እት ዓራቱክ ሐልሓል፣ ናይ እስትዕማር አሳር አርተዳኑ መባኒ ዲብ ከረን፣ ገላብ፣

ዔለበርዕድ ወአሳር ንዓል ድፈዕ ግድለ ሰላሕ እት በነት ሐመልማሎ ወሮረ መንሳዕ ውብዕድ ናይ ደያናት አሳር ማርያም ደዓሪት፣ ማርያም ደብረሲኤ፣ ሲዲ በክሪ፣ መቅበረት ዐሳክር ጥልያን ከምስልሁመ መቅበረት ዐሳክር እንግሊዝ ቀዲም አሳር እት አሮተ ደብሬ በዓል እት ሀበሮ መዝረት ውብዕድ ጀዛብ መካሪት ምድር ወወሓይዝ መሓዝ ዐንሰበ ዐጃይብ ላቱ ሔዋናት ከደን መንፈዐት እቅትሳድ ለቡ ዕጩይ ወፍሬታት ከደን ውብዕድ ናይ ዓዳት አሳር ክምኩም ለልትረኩብ አቅሊምቱ።

ዔማት እቅትሳድ
መሓዝ ዐንሰበ ዎሮ ምን ዐባዩ ወሓይዝ ዐድነ እብ ምግብ አቅሊም ዐንሰበ እንዴ በትክ እግል ምዴርያት ዔለበርዕድ፣ ከረን፣ ሐመልማሎ ወሀበሮ እንዴ ኬደ ሰበት ለሐልፍ አጥራፍ ናይ እሊ መሓዝ እብ ብዝሔ ዘበናይ እብ መሰኖ ለገምል ወራታት ሐርስ ለገብእ እቱ ክምቱ ዲብ መጃል እቅትሳድ ናይ እሊ



ብቅል ለልትሐረስ እት ገብእ፣ እት ግንራራብ መሓዝ ዐንሰበ መ ለትፈናተ ፈዋኪ (አራንሺ፣ ማንጉሱ፣ ሎቢን፣ ዘይቱን፣ ምንደሪን ውብዕድ) ክመስለሁመ ሐመሊት (ኮመዶር፣ በሰል፣ ባምዩ፣ ሙሉክየት፣ ቆሰጤ፣ ካውሎ፣ ጎዕ በርበረ ውብዕድ ፈሬ እቱ። ምናተ እስትዕማር እበ ሰበበዩ መደረት ገጽ ሰሪት ጋንሑ ምንመ ዐለ፣ አቅሊም ዐንሰበ እብ እተይ ፈዋክህ ርዙቅ አቅሊም ቱ። ሐርስ ዔለበርዕድ፣ መከላከል፣ ጸባብ፣ ደዓሪት ወአጥራፍ ሕሊል ዐንሰበ ህዩ ገሌ ምነ እሙር አካናት ቶም። ዲብ እሊ አቅሊም ዐባዩ መሳኔዕ ምንመ ኢዐለ መአሰሳት እንታጅ ፈጃጂን ወሰደዱ፣ ልባን መስነዕ ሳልለት ሐሊብ ወፍገሪቱ፣ መስነዕ ነቢት እሱስ ዐለ። አሰክ አዜ ህዩ ሐሊብ ወፍገሪቱ ዲብ ዔለበርዕድ መስነዕ ነቢት ዲብ ሐጋት፣ መስነዕ ደወ ዲብ ከረን ክድመት ለሀይብ ህለ።

ከደማት እጅትማዕየት፦
ለበዝሕ መካሪት እሊ አቅሊም አድብር ወአወድግ ሰበት ገብአ ለትፈናተ በራምጅ ዐማር እግል ልሰርግል እቱ ስዱድ ወማል ብዙሕ ለጠልብ ቱ። እብሊ መታክል እንዴ ኢልትሐደድ ላኪን ዲብ ተዕሊም ወዓፍየት አሰክ ጠረፍ ብሩር ለልትሐመድ ወቀይ ትሰርገለ እግል ልትበህል ቀድር። ተአምርተ ናይ እሊ ህዩ መድረሰት ዳክልየት አሰማጥ (ቦርዲን አሰማጥ) ኩልየት ሐርስ ሐመልማሎ መድረሰት ተክኒክ ወሐርስ ሐጋት ዲብ እሊ ወክድ እሊ ሚዛንየት ዐባይ እንዴ ፈግረት እሉ ወሱክ ቅረፍ ልትወሰክ እተ ለህለ እሱብዳልየት ከረን እብ አውለውየት ምነ ልትረኡ ቱ።

ዔማት ብርሽር አቅሊም ዐንሰበ ማህረጃን ኤረትርየ 2023

